

1CO -

1 Korentə tián

Təntən sagı tə, Polə nə púpúní v pa

Korentə tián

Kərisə lià tə nə

Korentə tián təntən sagı tə yuu wa sugu

Lìù tə, v nə púpúní sagı ku tə

Ku yí *tuntunu Polə nə púpúní ku.

Lìà tə nə, v nə púpúní

Ku yí təntən sagı tə, Polə nə púpúní v pa Kərisə lià tə nə, ba nə wulə Korentə nə. Polə tətə nə dıga Kərisə lià púlí təntə dən. Nəŋə ku tə yırı, Polə nə púpúní ba nə:

Ku máná tə wa, də Korentə yí Gəresə nagwanaa tə wa tıfaru don. Ywəŋə də yà dáá zənzən ku wa. Korentə yà jə níá yuu bwərə yizıga bwálá bələ, tə nə pın, ku yí tu tə jıjə nə wulə ku wa. Yolu yà vəli yáá zənzən ku wa. Korentə tián dən yà twá pubunyirə mama nə də yıjınconji yirə mama nə, tə nə pın lià tə tuŋa yokukwınan.

Sagı tə wa sugu

Polə nì Korentə lià tə ŋwen tə nə ba ywàn. Ku tə nə súrí lá, Korentə tián yà tun sagı v nə, ku nə bwe bwıə zənzən, ku ga swın yojanan zənzən yoo. Polə dí yáá v bırtı ba də ba púlí tə pwè, v ga pìà, sə v pa ba pıí ba kə duən nə. U bırtı ba nətu, ba nə me, sə ba ya duən nə ndə Kərisə lià nə, lià tə tətənı wa, ba nə twá luv yofwamınan nə. Ku kwa nə, Polə le Korentə Kərisə

lià tə bwiə tə, v ga swìn kaswe yoo də badən nə à yèé kadən yoo, də Kərisə liù nə ti v tiàn nətu yoo, də Yu-Siŋu tarpınan yoo də nətu, ba nə mε, sə ba ja tə ba ma tun yoo, də yìèn duən.

1

Polə jùnì Kərisə lià tə Korentə nə

(Romə tiàn 1.1-7, Tòtònán 18.1-11)

¹ Yu twá də v fira tə, v ma kúrí à mù Polə, sə à yà Zwezi-*Kərisə *tuntunu. À mù də Sosətenə, v nə yi à nubiu Kərisə yiri, nə púpúní sagi ku tə, nə pın aba. ² Ku yi nə púpúní ku, á mù Kərisə lià púlí tə nə, ku nə wulə Korentə nə. Yu twá də Zwezi-Kərisə, v li aba v tún, v pa v tiàn nə. U kúrí aba, sə á yà v mù nyiən. Sagi ku tə tà á mù Korentə tiàn cici nyiən. Ku yi á mù də lià tə, ba nə wulə bwálí tə mama nə, ba ga boŋə ba kəni nə *Yuu-Tiu Zwezi-Kərisə yiri tə nə nyiən. Zwezi-Kərisə təntə yi nə mù də ba mù mε Yuu-Tiu. ³ Nə nyina Yu də nə Yuu-Tiu Zwezi-Kərisə nə wá fwa pubwanu á yira, ba ga pa aba bican sié.

Yu fwa zəni Korentə tiàn yira

(Filipə tiàn 1.3-6, Kolosə tiàn 1.3-6)

⁴ À kəni Yu lèè wuuu, à pın aba. U twá də Zwezi-*Kərisə, v ma fwa v pubwanu tə á yira. ⁵ Á mù də Zwezi vwə duən nə. Ku mù nə pın, v ma pa aba tarpınan mama. Á nı Yu sùràn tə yənu zənzən, á ga yèé ku ka swìn ka biri də. ⁶ Nə swìn Zwezi-Kərisə suywánú tə, nə biri aba. Yá suywánú tə cígá zua aba. ⁷ Yá tarpıwn won tə mama, Yu nə fwa, ku wà aba mùrì. Á dān ya á dānì mánjá tə nə, *Yuu-Tiu Zwezi-Kərisə nə wá pìí v bà, v biri v tiàn, v nan á yíá yuu. ⁸ U mù nə wá pa, á ga zıgı diàn Yu nyiən tə wa dun mama, ku ja vələ luv zaŋu mánjá nə, Zwezi nə túrí dun tə nə, sə á dānà ká ja yoo, ba nə

wá caga á nii nə ku yiri. ⁹ Yu yi pùé nədu tíú, v tətə nə kúrí aba, sə á vwə v bìú Zwezi-Kərisə yira. U mù nə yi nə Yuu-Tiu.

Nimarv yà tələ Kərisə lià púlí tə wa Korentə nə

(1 Korentə tìán 3.3-8, 21-22)

¹⁰ À nubia-ba, à mù də á mù mε yi nə vwə *Yuu-Tiu Zwezi-*Kərisə nə. Ku mù nə pın à lòrì aba, sə á cugu à sugu, à ma kwè aba. Á pıan á ya nədu, sə pwia dân ká yà á pwéré wa. Á dân kənə nii nədu, sə á ja pubuŋa nədu. ¹¹ À nubia-ba, lià nan kan tə, ba nə boŋə Kəlowe*f1* sàñ con. Ba bà, ba swìn á yoo. Yá à nì də, ba wú, á dı jara də duən. ¹² Won tə, à nə pìà, sə à swìn, ku mù nə yi də, á nii sùràn tə tà nədu. À nì də, lià wulə á wa, ba nə swìn də, ba mù wulə Polə kwa. Ba duən də kúbè wú, ba də yi ba wulə Apələsə kwa. Ba duən də kúbè swìn, ba wú, ba də yi ba wulə Sefasə*f1* kwa. Ba duən də kúbè swìn, ba wú, ba də yi ba wulə Kərisə kwa. ¹³ Kərisə yi v pwè duən wa naaa? Ku yi à mù Polə nə, ba paa dagarv tə yuu wa, sə à tı á yiri naaa? Nə à yèé ku yi à mù Polə yiri tə nə, ba twá ba ma lə aba níá wa, ku twá də Yu yiri tə naaa? ¹⁴ À kəni Yu lèè də, à nə wà á liù mama li níá wa, də ku nə tà Kərisəpisə də Gayisə cıci. ¹⁵ Ku nətv tə pın, liù mama wàri v swìn də, ku ya à mù yiri nə, ba twá, ba ma lə aba níá wa. ¹⁶ Uhuun, à lıí də, à tə ləgə Sətefanəsə də v diè lià níá wa. Ku tə, ku nə ga tə mù, à yəri də, à nə ləgə liù don níá wa. ¹⁷ Zwezi-Kərisə yi v tun nə, sə à swìn suywánú tə, à bırı lià nə. U wà nə tun, sə à lə lià níá wa. À nə swìn suywánú tə, ku tà ləzoni wubūŋa nə à ma swìn ku. À yà nə swìn ku də ləzoni wubūŋa ku yà wá pa Zwezi-Kərisə tian tə dagarv tə yuu wa ya tutu ku pa ləzoni nə.

Yu diàn tə də v yənu tə

(1 Korentə tìán 3.18-20, Matia 11.25-27)

¹⁸ Sugu tə, ku nə bırı də, Zwezi-*Kərisə tıga dagarv tə yuu wa, yi ləyəri

yoo, ku pa là tà nà, ba nà wulə cwəŋə wa, ku nà jén ba míámíán. Yá ku yi Yu diàn yoo, ku pa nà mù là tà nà, nà nà wulə cwəŋə tà wa, Yu nà twá ku nà, v ma jon nəba nà cuna wa. ¹⁹ Ku púpúní Yu sagi tà wa, ku wú:

«À wá cùgù wubunyina wubuŋa, à ga pa yənu tián də yənu jì tutu.»

²⁰ Də Yu nà swìn nətu, wubunyiən tələ. *Zwifə-ba Yu *nii yənu tíú kùb tələ. Tútənyən də tələ, máná ka tà wa. Yu pín, tia yuu ləzoni wubuŋa tà jì ləyəri yoo. ²¹ Yu twá də v tətə wubuŋa nà v ma buri də, v wà sè, sə tia yuu wubunyina ba lwarı wá də ba tətə wubuŋa tà. Ku mù nà pín, Yu ma sóní, sə v jon là tà nà, ba nà kəni ba waa v nà wuuu, ba cuna wa. Ku nətu twá v sùràn tà, nà nà swìn nà buri là nà, tà nà yi ndə ləyəri sùràn nà, wubunyina yáá con. ²² Zwifə-ba tà pià, sə ba na Yu diàn mumınu də yía, sə ba dān ma zıgı lá, ba pa cígá ku. *Gərekə-ba də pià, sə ba lwarı yìèn tà də ba tətə wubuŋa. ²³ Yá nà mù yi Zwezi-Kərisə, ba nà paa dagarv tà yuu wa yoo, nà nà swìn nà buri. Ku kàrà təntə yi cuguguran, ku pa Zwifə-ba nà, ku ga yi ləyəri yoo, ku pa là tà nà, ba nà tà Zwifə-ba. ²⁴ Yá là tà, Yu nà kúrí, də ku nà yi Zwifə-ba, nà à yèé Gərekə-ba con, Zwezi-Kərisə nà buri Yu diàn tà də Yu wubuŋa tà. ²⁵ Yìèn duən ku yàá yi ndə Yu ya ləyəru. Ba mə, sə ba lwarı də, Yu ləyəri dwə ba wubuŋa. Yìèn duən də wa, ku yàá yi ndə Yu ba diàn ja də. Ba mə, sə ba lwarı də, Yu bwàni dwə ba diàn.

²⁶ À nubia-ba, á ywàŋá là tà, Yu nà kúrí, v kə duən nà, sə ba ya á púlí tà. Də ku nà yi tia yuu ləzoni wubuŋa wa nà, wubunyina ba dáá á wa. Ku nà kùb ya diàn yoo, də diàn tián ba dáá á wa. Nə à yèé ku nà kùb yi dun yoo, dun tián ba dáá á wa. ²⁷ Yu kúrí là tà, tia yuu ləzoni nà buŋa də, ba yi ləyirən tà, sə v ma pa wubunyina tà ya tutu. U kúrí wiən tà, ba nà buŋa də, tà ba diàn jə tà, sə v ma pa diàn tián tà ya tutu. ²⁸ Yu kúrí là tà, ba nà buŋa də, ba ba dun jə tà, də ləzwənbii tà tia tà yuu wa. U kúrí là tà, ba nà ba jəli ba kəni là wa, sə v ma pa dun tián ya tutu. ²⁹ Yu fwa ku nətu tà, sə tia yuu ləzwənə mama dān ká bu v tián nà, v mù Yu yáá con.

³⁰ Də ku nə yi á mù yoo, ku twá də Yu, á ma vwə Zwezi-Kərisə yura. Yá Zwezi-Kərisə dān nə yi nə wubuŋa. Ku pià ku biri də, Zwezi nə kwen nə cuna tə v li, sə nə ya cígá tián, sə nə yá nə tián míámíán Yu jìàn wa. Yá v yè nəba v jon də v jana tə, sə nə tɪnɪ nə tiàn. ³¹ Ku mɛ, sə ku ya ndə ku nə púpúní Yu sagɪ tə wa, ku wó:

«Lìù tə, v nə pià, sə v bwi lìù nə, sə v bu *Yuu-Tiu nə, won tə cɪcɪ yɪɪ,
Yuu-Tiu nə fwa tə.»

2

Polə yoo nə yi Kərisə, ba nə paa dagarv tə yuu wa

(2 Korentə tián 4.5-7)

¹ À nubia-ba, mánǵá tə, à nə twi á con, sə à swìn Yu cígá tə, ka nə sègè, à biri aba, à wà sùràn tə, tə dèñ niu nə cà, nə à yèé ləzwənə wubuŋa nə twá, à ma swìn ku á con. ² Ku mánǵá tə wa, à wà sírí ken, sə à biri yoo don á tətəŋi wa, də ku nə tà Zwezi-*Kərisə yoo. U mù Zwezi-Kərisə tə, ba nə paa dagarv tə yuu wa. ³ À mù Polə tətə twi á con, mánǵá tə wa, də à ba diàn jə də fən yà jə nə, à ga vivaga zənzən. ⁴ À sugv tə də à kàrà tə ya tà ləzoni wubuŋa sùràn, à ma swìn aba à dɪ. À kàrà tə mánǵá wa, Yu-*Siŋu tə də Yu diàn tə nə ken à sùràn tə cwəŋə wa. ⁵ Ku mù nə pɪn, á nə ken á waa Yu nə, tə kùù tà ləzoni wubuŋa yɪɪ, ku yi Yu diàn tə yɪɪ.

Yu-Siŋu tə biri wubuŋa mama

(Efɛzə tián 3.2-11, 1 Zwan 2.20, 27)

⁶ Nə kàrà tə, ku yi wubuŋa nə, nə swìn nə biri là tə nə, ba nə bori Yu cwəŋə tə wa. Ku wubuŋa təntə tà síún luw wubuŋa. Ku tà síún luw diàn tián yənu. Diàn tián nə yàá bà ba jén. ⁷ Yu wubuŋa tə sègè tia yuu ləzoni yáá con. Mə tə mù yoo nə, nə mù swìn nə biri. Yu tanɪ ku v tún, də v tə wà luw

fwa, sə v ma twá ku nə, v pa nə píí nə na dun v mù Yu con. ⁸ Síún luv diàn tián wà ku wubuŋa tǝntǝ lwarí. Də ba yà nə lwarí ku, ba yà bá paa *Yuu-Tiu tǝ, v nə yi dun tíú, dagarv tǝ yuu wa, ba gv. ⁹ Ndə ku nə púpúní Yu sagí tǝ wa, ku wú:

«Won wulə, ləzwənə yii nə wà ku ni míámíán, v zuun nə wà ku ni míámíán, v ga ba ku yoo buŋa v waa con də. Mə ku mù won tǝntǝ nə Yu taní, sə v pa lià tǝ nə, ba nə swə wá.»

¹⁰ Yu twá də v *Siŋu tǝ, v ma biri ku yoo tǝntǝ nə mù nə. Yu-Siŋu tǝ yàá balv won mama. Ku yàá balv Yu pubuŋa tǝ, ka nə lù tǝtǝ, ku lwarí ka dǝn.

¹¹ Də nə nə ti ləzwənə nə ywǎn, nə yǝé də, ku nə tà v tǝtǝ waa tǝ, nə yǝé ku tǝ, v nə buŋa, liù don mama yəri ku. Mə ku yi nətv Yu də con, Yu-Siŋu tǝ cici nə yǝé won tǝ mama, Yu nə buŋa. ¹² Yu pin nəba Siŋu tǝ, ku nə nan v con, sə ku pa nə lwarí tarpívn tǝ, Yu nə ma fwa zəni nə yira. Yá ku tà lià tǝ, luv nə kəni cwəŋə wa pubuŋa tǝ, nə Yu pin nə mù nə. ¹³ Ku mù nə pin, nə ba ləzoni wubuŋa sùràn nə twá, nə ma swín ku yoo. Ku yi nə twá ku tǝ nə, Yu-Siŋu tǝ nə biri nəba. Mə nətv, nə nə twá, nə ma gùlí cígá tǝ, ku nə naŋa Yu con, nə biri lià tǝ nə, ba nə zílí Yu-Siŋu nii. ¹⁴ Ləzwənə tǝ, v nə twá v tǝtǝ pubuŋa nə, v ba Yu-Siŋu tǝ yoo sè. Yu-Siŋu tǝ yoo yi ndə ləyəri yoo nə v con. Ku yà mɛ, sə Yu-Siŋu tǝ ya də wá, sə ku pa v ni ku dǝn. Yá Yu-Siŋu tǝ dǝn tǝlǝ də wá. Ku mù nə pin, v wàri ku dǝn v ni. ¹⁵ Yá ləzwənə tǝ, v nə zílí Yu-Siŋu tǝ nii, v mù wàá won mama dǝn v lwarí. Liù don ga wàri v mù dǝn v lwarí. ¹⁶ Ku yi cígá, ku yi ndə ku nə púpúní Yu *sagí tǝ wa, ku wú:

«Wàà nə yǝé ku tǝ, Yuu-Tiu nə buŋa? Wàà ga nə wàá kwiè v pin Yuu-Tiu nə?»

Yá nə mù ja pubuŋa ndə Zwezi-*Kərisə pubuŋa tǝ nə.

Yu tütünà tɛ tutuɲi tɛ nɛ yi nɛtu

(Ebərə 5.11-14, 1 Korɛntɛ tìán 4.1-6)

¹ À nubia-ba, à nɛ dí yáá à swìn á con tɛ, à yi à swìn á con, ndə lià tɛ nɛ, ba tɛ nɛ twá ba tɛtɛ pubuɲa nɛ, ba nɛ yi ndə bìsíná nɛ Zwezi-*Kərisə kwa. À wà wàní à swìn á con, ndə lià tɛ nɛ, ba nɛ zìlí Yu-*Sɪɲu nii. ²⁻³ Á tɛ wàri wodiɹu tɛtɛ á dɔ. Ku mù nɛ pɪn, à sùràn tɛ, à nɛ swìn á con tɛ, yi ndə nayila nɛ, à nɛ pɪn aba. Á yà yi lià tɛ, á nɛ tɛ twá á tɛtɛ pubuɲa nɛ. Ku mù nɛ pɪn, dɛ zèn mama, á tɛ wàri ku á dɔ. Á tɛtɛɲi wa, á tɛ jə wɔgwɹu dɛ á dɪ jara dɛ duən. Ku nɛtu tɛ bɪri dɛ, á mù dɛ ləzoni tɛ duən tɛ, ba nɛ twá ba tɛtɛ pubuɲa nɛ, yi nɛdu. Yá á dɛ tuɲa yìèn tɛ, ba nɛ tuɲa tia yuu. ⁴ Ku twá dɛ á liù don nɛ yáá swìn, dɛ v mù wulə Polə kwa. U don dɛ tɛ wú, v mù wulə Apɔlɔsə kwa. Ku nɛtu tɛ bɪri dɛ, á tutunɛɛ tɛ yi ndə ləzoni tɛ, ba nɛ twá ba tɛtɛ pubuɲa nɛ.

⁵ Cígá mama, Apɔlɔsə nɛ yi wàà? Sə à mù Polə nɛ yi wàà? Nɛ yi Yu tütünà mùú. Yu twá dɛ nɛba, v ma van aba, v pa á kə á waa v nɛ. Yuu-Tiu pɪn diàn nɛ liù mama nɛ, sə v ma tun tutuɲi tɛ, v nɛ mɛ, sə v tun. ⁶ Ku yi ndə à mù Polə nɛ cwɛn tìú nɛ, Apɔlɔsə dɛ ma gàri níá ku dèñ nɛ, yá Yu dàñ nɛ pɪn ku bori. ⁷ Ku mù nɛ pɪn, nɛ mɛ, sə nɛ lwarɪ dɛ, liù tɛ, v nɛ cwɛn tìú tɛ, dɛ liù tɛ, v nɛ gàri níá tɛ ku dèñ nɛ, ba mù mɛ yi tutu. Yu cici nɛ jə dun, v nɛ pɪn tìú tɛ bori tɛ yiri. ⁸ Liù tɛ, v nɛ cwɛn tìú tɛ, dɛ liù tɛ, v nɛ gàri níá tɛ ku dèñ nɛ, ba mɛ yi won nɛdu. Yá nɛ liù mama wá na v tɛtɛ tutuɲi tɛ ɲwírán. ⁹ À mù Polə dɛ Apɔlɔsə mù yi nɛ tuɲa dɛ duən Yu tutuɲi tɛ wa. Á mù yi ndə Yu kára nɛ, nɛ à yèé ndə Yu diè nɛ, v nɛ lwè.

(Efɛzə tìán 2.20-22, 1 Piɛrə 2.4-6)

¹⁰ Yu nɛ fwa pubwanu à yira, sə à tun à pa wá. Ku yi ndə à nɛ dɪga diè dèñ, ndə dèlwèré nɛ, v nɛ jə wubɹa. Yá liù don dɛ kúbè twi, v lwà ka bérí tɛ. Liù mama dàñ nɛ mɛ, sə n cì n tìàn nɛ dɛ lwiu tɛ yiri tɛ, v nɛ lwè ka

yuu wa. ¹¹ Ku mù yiri nà, liù don mama kùb wàrì dèñ don u tuŋə, də ku nà tà Zwezi-**Kərisə*, u nà dí yáá u wulə lá. ¹² Lià duən wá ja síán, nà à yèé cunia, nà à yèé kapana wárá, tə səbiu nà dáá zənzən, ba ma lwè ku béré tə. Ba duən də wá ja dɛɛ, nà à yèé gakuru, nà à yèé sisiran, ba ma lwè ku béré tə. ¹³ Dun tə, Yu nà wá bɛrì ləzoni tə bura, liù mama tutuŋi wá nan poni nà. Yá Yu dàñ wá pa liù mama tutuŋi twá mən tə wa, sə tə biri won tə, ku nà yi. ¹⁴ Liù tə, u tutuŋi tə nà wà mən dí, Yu wá ŋwín ku tíú təntə. ¹⁵ Liù tə, u tutuŋi tə nà dí mən, ku tíú wá kwìn u ŋwírán tə nà. Yu wá jon u tətə mù, ku dàñ nà wá yà ndə u twá mən wa.

(1 Korəntə tián 6.15-20)

- ¹⁶ Á yèé zəni də, á yi ndə Yu **diè* nà, Yu-Siŋu tə ga wulə á waa tə wa.
- ¹⁷ Də liù nà cùgù Yu diè təntə, Yu də wá cùgù ku tíú. Ku diè təntə yi diè, ku nà yi Yu nyiən, á mù ga nà yi ku diè təntə.
- ¹⁸ Liù mama dàn ká gɪgarɪ u tián. Də á wa liù nà buŋa də, u mù jə tia yuu ləzoni wubunja, ku tíú mɛ, sə u jì ndə ləyərɪ nà ba con, sə u cígá ma ya wubunyiən. ¹⁹ À swìn ku nətu, sə à ma biri də, tia yuu ləzoni wubunja yi ləyərɪ Yu yáá con. Yá ku nà púpúní Yu sagɪ tə wa, ku wú:
- «U wá ja wubunja tián tə ba tətə yíá swian tə wa.»
- ²⁰ Ku tə swìn ku sùrí lá, ku wú:
- «Yu yèé yənu tián tə pubunja tə nà yi nətu. U yèé də, ka yi tutu.»
- ²¹ Won tə mama dàñ yi á mù nyiən. Ku mù nà pun, liù mama dàn ká ti ləzwənə, u ma fwa fwiə. ²² Tə mama míámíán yi á mù nyiən. À mù Polə, də Apoləbə, də Sefasə**f1**, də luv tə, də mu tə, də tian, də síún mánjá ka tə wiən tə, də mánjá tə, ku nà wá bà wiən tə, tə mama míámíán yi á mù nyiən. ²³ Yá á tətə yi Zwezi-Kərisə nyiən, Zwezi-Kərisə də ga yi Yu nyiən.

Zwezi-Kərisə tètònà tə yoo

(1 Korəntə tìán 3.5-9, Romə tìán 14.10-12)

¹ Llà tə dān mə, sə ba jələ nəba ndə Zwezi-**Kərisə tètònà* nə, ba nə ywànjá v tutuŋi tə yuu, sə nə tun də v cígá tə, ku yà nə sègè. ² Də ba nə pɪn tutuŋi liù nə, sə v ywànjá ku yuu won tə, ba nə pià, sə v fwa, ku mù nə yɪ, sə v tun ku tutuŋi təntə də pùé nədu. ³ Də ku nə yɪ à mù Polə con nə, á nə swə, sə á buri à bura də, ku ba nə yì. Nə à yèé ləzoni tə, ba nə buri bura nə swə, ba buri à bura də, ku ba nə yì. À tətə ga ba à tiàn bura buri. ⁴ Ku pià ku buri də, yoo tələ à pubuŋa wa. Ku nətu tə dān nə ba buri də, à wá jì cígá tíú Yu yáá con. **Yuu-Tiu* nə wàá à bura v buri. ⁵ Ku mù nə pɪn, á dānà ká buri liù mama bura v tutuŋi yuu wa, də ku mánjá tə wà yí. Á dānà də Yuu-Tiu pɪi v twi. U mù nə wá li wiən tə mama, tə nə sègè, yikunu wa, v kə poni wa. Ku tə ləzoni tə nə buŋa ba waa con, v wá li ku v buri. Ku dun təntə nə, Yu wá bu liù mama nə, v tutuŋi tə yɪ, v nə fwa.

⁶ À nubia-ba, à swin ku nətu tə à mù də Apolə sə yuu wa, sə ku wànjá ku pa aba kwìè. À pià, sə á twá də nəba, á ma sè ku tə, ku nə púpúní tə cici nii. Sə á liù mama dān ká tì liù, v zigi v yira, v ma fwa fwìə, á ga muŋə liù don. ⁷ Won mama tələ, ku nə buri də, n dwə n duən tə. Won tə mama n nə jə, ku yɪ Yu nə pɪn ku mù. Də ku nə yɪ, Yu nə pɪn mú tə wiən təntə mama, bè nə pɪn, n ma pɪn dun n tiàn nə, ndə ku tà Yu nə pɪn mú tə?

(2 Korəntə tìán 6.4-10, Filipə tìán 2.19-22)

⁸ Awo, á buŋa də, á manwarɪ á jə wiən tə mama, yá won mama wà aba mùrì. Á manwarɪ á jì jujə tiàn Yu cwəŋə tə wa. Á manwarɪ á yɪ pègá, yá nə mù ga tà pègá. Ku yà yɪ yozəŋu, də cígá mama, á nə ya pègá Yu yáá con, sə nə də twá á dwani nə, nə dó ku pàrì təntə. ⁹ À buŋa də, nə mù jigə mumun lià luu mama wa, də **malike* yáá con, də ləzoni yáá con. Ku mù nə pɪn, à buŋa də, Yu ken nə mù lià tə, nə nə yɪ Zwezi-Kərisə **tuntuna* tə, lià

tə mama kwa wa. Nə yi ndə lià tə nə, bura nə jun nəba, ba nə me, sə ba cùgù nəba. ¹⁰ Nə mù yi ləyirən Zwezi-Kərisə yurɪ, yá á mù yi yənu tián Zwezi-Kərisə yoo wa. Nə mù yi labwana, yá á mù yi diàn tián. Lià pɪn dun á mù nə, yá ba ba dun pɪn nə mù nə. ¹¹ Də zən mama, nə mù yi niən də nanyunɪ nə jə nəba. Nə mù nə ba gànù də jə, lià də ga mà nəba, nə twá lá nə nə ywaŋa. ¹² Nə yáá tun jìlàn tutunan, nə yura ce zəni. Ba nə twɪn nəba, nə tə yáá lòrì Yu, sə v fwa zəni ku tián yuu wa. Ba nə fɪfɪn nəba, nə yáá píní ku nə wɛɛ con. ¹³ Də ba nə dí tɪjaŋa, ba kə nə nii nə, ku yi nə yáá zùrì ba bɪcanɪ, sə nə pɪí nə kə duən yuu. Lià tə, ba nə yi luv nə kəni cwəŋə nə mù yáá con, nə yi lià tə, ba wɛɛ nə nan nəba, nə yi ndə ywərən nə, ba nə yáá lwé pùré yuu wa. Halɪ, ku ja bà ku yí zən.

¹⁴ Ku yi yoo nə, à dí yáá à swìn á con, à tunjə lá. Á mù nə yi lià tə, á nə ya à bia tə, à nə swə. Ku tà à púpúní yìèn tə tə, sə à ma kə cavɪra á nə. ¹⁵ Də á nə swə, á jə lià duən zənzən, ku tián nə bɪrɪ aba Zwezi-Kərisə cwəŋə tə wa, á nyɪna mù tə yi nədu. Á mù nə yi á nyɪna Zwezi-Kərisə cwəŋə tə wa. Ku twá də, à mù nə nə dí yáá, à swìn suywánjú tə á con, á ma kə á wɛɛ ku nə. ¹⁶ À dān kwè aba, sə á fwa ndə à nə. ¹⁷ Ku mù yurɪ nə, à tunja à biswənə Timote, v nə twá *Yuu-Tiu cwəŋə tə də pùé nədu. À tunja wá, sə v bà v pɪí v líí aba ku tə, à nə yi Zwezi-Kərisə cwəŋə tə wa. Ku tə, v nə wá kàrì aba, də ku tə, à nə kàrì Kərisə lià púló tə bwálá mama wa, yi nədu.

(2 Korentə tián 10.1-11)

¹⁸ Á wa lià duən wulə ba fwa fwiə, ndə ku yi à kùù bá pɪí à bà á con. ¹⁹ Yá də ku nə yi Yuu-Tiu fɪra, à wá bà á con síún síún. Máná tə wa, à nə wá yí á con, ku kùù bá ya ba níó sùràn tə nə, à wá lwarɪ. À dān wá lwarɪ, də ba cígá nə jə diàn. ²⁰ Də Yu nə dé pàrì liù yuu wa, Yu diàn tə də tunja də wá, ku tà nii sùràn cɪcɪ. ²¹ Bèè won nə, á dān pìà? Á pìà də, máná tə wa, à nə biàn á con, sə à ja kafu à bà à ma fɪrɪ aba naaa? Nə à yèə, á pìà də, à nə biàn, sə à bà də sonu də bɪcabwanu?

Bacwan wulə Korentə Kərisə lià púlí tə wa

(1 Timote 1.19-20, Galasi tìán 5.9, Ebərə-ba 10.22)

¹ À nì də, lià zənzən swìn á yoo, də á tuŋa bacwan á pwéré wa. Ku bacwan təntə, á nə tuŋa tə, lià tə də tətə, ba nə yəri Zwezi-**Kərisə*, ba tə yìèn təntə tuŋa ba pwéré wa. Ba swìn də, á wa liù don tì v nyina kan, v ma fwa v kan. ² Ku yoo təntə yà mɛ, sə ku ya pucunɪ, ku pa aba. Yá də ku nətu tə mama, ku tə yɪ fwɪə nə jə aba. Ku yà mɛ, sə á dɪŋɪ ku bɛɛ təntə, v nə tun ku yolwan təntə, á lɪ á tətəŋi wa. ³ À mù tətə təlɛ də aba, yá à pubuŋa wa, à wulə də aba ku yoo tə wa. Ku mù nə pɪn, à mù dí yáá à bɪrɪ ku bɛɛ təntə yolwan tə bura, ndə ku ya à wulə də aba. ⁴ **Yuu-Tiu Zwezi* yuu yɪrɪ, à swìn á con, sə á lwarɪ, ku tə, á nə mɛ, sə á fwa. Ku mɛ, sə á jèń duən yáá nə, sə ku bɛɛ təntə bura ma bɪrɪ. À pubuŋa tə wá yà də aba. **Yuu-Tiu Zwezi* diàn tə də wá yà nə tətəŋi wa. ⁵ Ku máná təntə, á nə kun duən nə nətu tə, sə á dàń dɪŋɪ ku bɛɛ təntə, á lɪ á púlí tə wa, sə v va v ya də **Sitana*. Sitana wá cùgù v yura tə, sə Yu ga jon v jèré tə, diun tə nə, **Yuu-Tiu Zwezi* nə wá pɪí v bà, v bɪrɪ ləzoni tə bura.

⁶ Ku ba ziən, sə á tì ku, á ma fwa fwɪə. Á yèé də, ba nə pìà, ba fwa dipen, ku yɪ sabwarɪ mancɪn nə, ba yáá ma pa dipen mun tə mama zàn tə ɲɛ̀nɪ.

⁷ Zwezi-Kərisə dàń nə yɪ nə **Pakə cànà* tə **pabiə*, ba nə gva nə cuna yɪrɪ. Á dàń mɛ, sə á lɪ cuna nədwara tə, tə nə yɪ ndə sabwarɪ nə, á tətəŋi wa. Sə ku pa á ya ndə dipen mun nədun nə, sabwarɪ nə wà ku wa ken. ⁸ Ku mù nə pɪn, nə mɛ, sə nə dé cànà təntə də dipen tə, ku wa nə ba sabwarɪ nədwan jə. Nə dàń duŋa ku tə, ku nə yɪ cuna də wulɔŋv yìèn tə, sə nə dàń ga ya lià tə, nə bɪcɪnɪ nə yɪ nəpwənə, ba nə yɪ cígá lià.

(Zwidə 22-23)

⁹ À sagi tɛ, à nɛ púpúní á nɛ tɛ, à swìn ku wa dɛ, á mù dɛ lià tɛ, ba nɛ pèní duɛn vɛɛ vɛɛ tɛ dɛn ká jèń duɛn nɛ. ¹⁰ Dɛ à nɛ swìn ku nɛtu, ku tà lià tɛ, ba nɛ tà Kərisə lià tɛ nɛ, à swìn. Ba mù yi lià tɛ, ba nɛ pèní duɛn vɛɛ vɛɛ, ba duɛn yi lià tɛ, lià wiɛn nɛ jə yimən tɛ pa ba, ba duɛn yi lià tɛ, ba nɛ vɪɪ lià wiɛn dɛ diàn, ba duɛn yi lià tɛ, ba nɛ pɪn dun woŋwanan tɛ nɛ, ba ga dugu Yu vàn nɛ. Dɛ liù nɛ ba pià, sɛ v ya dɛ ku lià tɛntɛ, ku tíú yi v mɛ, sɛ v nan luu wa míámíán. ¹¹ Ku tɛ, à nɛ púpúní tɛ, ku tà nɛtu. Ku yi á púpúní ku á mù lià tɛ nɛ, á nɛ yi nubia Kərisə yɪɪ. Dɛ liù nɛ wú, v yi á nubiu, yá ku tíú tɛ ga pèní lià vɛɛ vɛɛ, nɛ à yèé lià wiɛn yimən nɛ jə wá, nɛ à yèé v nɛ pɪn dun woŋwanan nɛ, v ga duga Yu vàn nɛ, nɛ à yèé v nɛ twɪn lià, nɛ à yèé v nɛ nywɪn swana v tətəli, nɛ à yèé v vɪɪ lià wiɛn dɛ diàn, á dɛnà ká jèń dɛ ku tíú. Á mù dɛ ku tíú dɛnà ká dɛ wodiɪ tətɛ dɛ duɛn. ¹² Á mù Kərisə lià tɛ bura yoo nɛ ywàŋá nɛ. Lià tɛ, ba nɛ tà Kərisə lià tɛ bura yoo ba nɛ ywàŋá. Yá ku yi á dɛ nɛ mɛ, sɛ á bɪrɪ á púlí tɛ bura. ¹³ Yu nɛ wá bɪrɪ lià tɛ, ba nɛ tà Kərisə lià tɛ, bura. Á dɪŋa liù tɛ, v nɛ tuŋa lwanɪ tɛ, á tətəŋi wa, á li.

6

Kərisə lià bura nɛ mɛ, sɛ ku ya nɛtu

(Zwakə 4.1, Matia 5.23-24, Romə tián 12.17-18, Efɛzə tián 5.3-8)

¹ Dɛ á púlí tɛ wa, liù nɛ yèé liù don yoo, v nɛ pià, sɛ ba bɪrɪ ku bura, ku twá nɛtɛ v ma pií v ja ku, v vɛli v swìn lià tɛ nɛ bɪrɪ bura tɛ con, ba nɛ tà *Kərisə lià tɛ? Ku mɛ, sɛ v swìn ku lià tɛ cɪcɪ yáá con, ba nɛ yi Kərisə nɛ ti, sɛ ba mù nɛ bɪrɪ ku bura. ² Á yèé dɛ, ku ya lià tɛ, ba nɛ yi Kərisə nɛ ti, nɛ wá bɪrɪ lià tɛ mama, ba nɛ yi luu nɛ ti, ba bura. Yá cígá mama dɛ á nɛ mɛ, sɛ á bɪrɪ lià tɛ, ba nɛ yi luu nɛ ti, ba bura, bèè nɛ pɪn á wà mɛ, sɛ á bɪrɪ yobii tɛ tɛ bura? ³ Á yəri dɛ, nɛ mù nɛ wá bɪrɪ *malukɛ tɛ dɛ tətɛ bura

naaa? Ku nə yi nətu, də nə nə wá b̀̀r̀i malikε bura, ku mε, sə nə b̀̀r̀i tua ku tε yuu ỳ̀n tε bura. ⁴ Á d̀̀n nə jε yoo ku nə mε, sə ku sẁn, ku yi nətə á ma p̀i á ja ku, á v̀li á p̀n lià tε nə, ba nə ba funə jε Kərisə lià p̀l tε wa, sə ba mù nə lı ku yoo təntə yáá? ⁵ Ku yoo təntə yi á cavıra yoo nə, à sẁn. Liù nəd̄u mama tà nə t̀l á mù Kərisə lià p̀l tε wa, ku tíú wubũja nə yí, sə v ẁnı v b̀r̀i bura á mù lià tε, á nə yi nubia Kərisə yırı, pwéré wa naaa? ⁶ Á wa liù don yáá p̀i v ja v nubiu yoo v ja va, v sẁn lià tε con, ba nə tà Kərisə lià. ⁷ Də ỳn nə wulə á tətəji wa, liù don nə wá b̀r̀i tε bura, ku nətu tε bırı də, á ga tε nə. Də liù nə tun kunkun yoo á yıra, b̀è nə p̀n á ma ẁr̀i ku á p̀nı? B̀è nə p̀n, á ma ẁr̀i á p̀nı á p̀n v ŋẁn aba? ⁸ Á mù tətə d̀n nə p̀i á tũja kunkun ỳn də á ŋẁn á nubia tε duən tətə. ⁹ Á ỳé də, lià tε, ba nə tũja kunkun ỳn tε, ba bá twá ba ya Yu p̀r̀i tε wa. Á d̀nà ká gıgarı á t̀n, á lwara də, lià tε, ba nə p̀nı duən vεε vεε tε, də ba tε, ba nə p̀n dun wɔŋwanan nə, ba ga duga Yu v̀n nə, də ba tε, ba nə cẁr̀i, də bara tε, ba nə ba kan p̀à, ba ga p̀à bara duən, ba ma fwa ba kana, ¹⁰ də ba tε, ba nə yi ŋwına, də ba tε, lià wiən yimən nə jε ba, də ba tε, ba nə nywın swana ba tətəli, də ba tε, ba nə twın lià, də ba tε, ba nə vırı lià wiən də d̀n, ba mù ləzwənlwan təntə mama, bá twá ba ya Yu p̀r̀i tε wa. ¹¹ Á wa lià duən də yà yi ndə lià təntə nə, m̀já don wa. Yá sún nə, Yu sın á cuna tε. U tanı aba v t́n, sə á ya v mù nyiən. Yu twá *Yuu-Tiu Zwezi-Kərisə də v *Sıju tε, v pa á jı lià tε, á yi cígá t̀n v yáá con.

Nətu tε á yıra tε nə mε, sə tε pa dun Yu nə

(1 Tesalonikə t̀n 4.1-7, 1 Piyerə 1.14-19)

¹² Á wa lià duən sẁn də, ba jε cwəŋə, sə ba fwa won mama. Də ku nə swə, ku yi cígá, ku d̀n nə tà wiən tε mama, ba nə fwa nə jε nywarı tε pa ba. Á sẁn də, á jε cwəŋə, sə á fwa won mama. Yá à mù Polə d̀n nə ba p̀à, sə won mama m̀ nə, ku ja à bian nə. ¹³ Á sẁn də, wodiú yi p̀é yırı

nə ku wulə, yá pùé də ga yi wodiw yiri ka wulə. Yá dun don nə, Yu wá pa pùé də wodiw me nyun lá. À mù con nə, ləzwənə yira tə mù yà tà Yu fwa ku, sə u ma pèñ lià duən vee vee. Yu fwa ku, sə nə jə ku, nə twá *Yuu-Tiu nə. Yá Yuu-Tiu də ga yi yira tə nyiən. ¹⁴ Yu pìi u bwin nə Yuu-Tiu, u li tian wa. Yá u wá bwin nə də, u li tian wa də u diàn tə. ¹⁵ Á yəri də, *Kərisə lià púlí tə nə yi Kərisə yira tə, yá á liù də mama ga yi Kərisə yira tə nandau naaa? Ku ziən, sə à ti Kərisə nandau tə don, à pa kacwaru nə naaa?

¹⁶ Abada! Ku tà nətə! Á yəri də, liù tə, u nə pèñ də kacwaru, u mù də kacwaru tə me jigə won nədu naaa? Ku yi ndə ku nə púpúní Yu sagi tə wa, ku wú: «Ba mù lià bələ təntə, ba nə tun ku yoo tə, dān wá jì won nədu.»

¹⁷ Yá liù tə, u nə ti u tiàn u marí Yuu-Tiu nə, ku tíú də Yuu-Tiu wá ya siŋu nədu tə wa.

¹⁸ Ku mù yiri nə, á dān duŋa ka cwàrì də duən tə. Cuna tə duən tə, ləzoni nə tuŋa, tə wà marí ba yira. Yá liù tə, u dān nə cwàrì, cuna tə yi u tuŋa u tətə yira. ¹⁹ Á yèé də, á yira tə nə ya Yu-Siŋu tə *dìè. U pin ku, sə ku bà, ku ya ku wa. Á yira tə kùbè tà á mù nə ti, ku ya Yu nyiən. ²⁰ Á na zəni də, Yu yè aba də kwənə tə nə dáá u jon. Á dān pian Yu na dun, won tə mama wa, á yira tə nə tuŋa.

7

Ka swe yoo

(Matia 19.3-12)

¹ Síún nə, à dān pià, sə à le á bwiə tə, á nə bwe nə á sagi tə wa: Ku ba ziən, sə bee pèñ də kan naaa? ² À dān nə kùbè pìi, à bún lià tə nə pèní duən vee vee tə yoo, à na də, ku ziən, sə bee mama swe u kan, sə kan də mama swe u barí nə. ³ Kanbarí tə me, sə u tun kanbarí tutuŋi u kan tə yira ba sapaa wa. Kan tə də me, sə u tun kan tutuŋi u barí tə yira ba sapaa wa.

⁴ Kan tə kúù ba v tətə yira tə ti, ku dān ya v barɪ nə ti v tətə yira tə. Bɛɛ tə də kúù ba v tətə yira tə ti, ku dān ya v kan nə ti v yira tə. ⁵ Yá bɛɛ də v kan wà mɛ, sə ba kán ba tiàn nə duən con. Də á nə pià, sə á pwè də duən tətə, ku mɛ, sə ku ya mánjá mancɪn wa, ku twá də nimaru nə, sə á ma juɪ Yu. Ku mánjá mancɪn tə nə lɛ, sə á píí á va duən con. Ku nə tà nɛtu, á bá wàní á ja á tiàn sɛnbwen. Yá *Sitana wá twá ku nə, v dódón, sə v yugə aba, v pa á tun yokukwɪn.

⁶ Ku tə à nə swìn nɛtən, ku tà ndə nii nə à pɪn aba, kan də v barɪ ka pwè duən nə yoo wa. Ku yi yoo tə, à nə na, də á nə fwa ku, ku tà yolwan. ⁷ Yu pɪn tarpɪnan yirə yirə liù də mama nə, sə n ma tun v tutuɲi tə. Ba duən con, ba də nyiən yi ku cɪci, ba duən də con, ba də nyiən yi ku cɪci. À mù Polə con nə, à mù yà swə, sə lià tə mama yà ndə à nə, ba dānà ká swe.

⁸ À dān swìn bara tə con, ba nə wà swe, də kadənə tə con də, ku ziən, sə ba ya lá nɛtu ndə à nə. ⁹ Də ba nə wàri ba tiàn ba píni, sə ba swe. Ku ziən, də á nə swe duən, ku doni, də á nə yá á pa ku fira dé aba.

¹⁰ À dān pià, sə à swìn ba tə ba swe tə con. Ku tà à mù nə pɪn nii ku tə. Ku ya *Yuu-Tiu nə pɪn ku. Kan tə, v nə swe, v dān ká nan v barɪ con. ¹¹ Də v nə nan v barɪ tə con də, sə v kúù dān ká píi v swe barɪ don. Nə à yèé də v nə pià barɪ, sə v píi v va v barɪ tə con, sə v pa ba kə duən yuu. Sə kanbarɪ tə də dān ká diɲi v kan v dugv.

¹² Síón nə, à pià, sə à swìn lià tə duən tə con. Ku ya à mù nə swìn, ku tà Yuu-Tiu nə swìn. Də liù tə, v nə yi á nubiú Kərisə yɪɪ, nə jə kan, v nə tà Kərisə liù, yá kan tə ga swə, sə ba ya duən nə, sə v dān ká diɲi wá v dugv.

¹³ Də kan də nə kúù ya Kərisə liù, yá v barɪ tə ga tà Kərisə liù, ku bɛɛ tɛntə ga swə, sə ba ya duən nə, sə kan tə dān ká nan v yá wá. ¹⁴ Yu twá də kan tə, v ma ti bɛɛ tə, v nə tà Kərisə liù tə. Yu twá də bɛɛ tə də, v ma ti kan tə, v nə tà Kərisə liù tə. Ku nə tà nɛtu, á bia tə, á nə lɪɪ, wá ya cuna bia. Yá ku cígá mama wa, ba ya Yu nə ti ba.

¹⁵ Də ba liù tə, v nə tà Kərisə liù tə nə pìà, sə v pwè də v tə, v nə yì Kərisə liù tə, sə v pwè də wá. Ku nətə tə wa, ku ba yoo mama jə, ku pa liù tə nə, ku nə yì á nubiu, nə à yèé á nubua Kərisə yiri, də ba nə pwè də duən. Yu ya swə, sə á ya duən nə də bican sié. ¹⁶ N mù kan tə, n nə ya Kərisə liù, n wàri n lwarì, də Yu nə wá twá də mú, v ma jon n barì tə v cuna wa. N mù kanbarì tə də con, n wàri n lwarì, də Yu nə wá twá də mú, v ma jon n kan tə v cuna wa.

Nətu tə, n nə yì Yu ma kúrí mú, n tə ya nətu

(Romə tián 6.18-22)

¹⁷ À pìà, sə à sùrí yoo ku tə lá nə. Ku mù nə ya, sə liù mama tì cwəŋə tə *Yuu-Tiu nə kúrí, v pa wá. Ku mù cwəŋə təntə, v yà nə tì də máná tə wa, Yu nə kúrí wá, sə v twá v mù Yu nə. Kərisə lià púló tə mama wa, ku mù nii təntə nə à pìn ba. ¹⁸ Də Yu nə kúrí bɛɛ, də v yà nə *gwəŋə, sə ku tíú ya lá nətu. Də Yu nə kúrí bɛɛ, də v yà tə wà gwəŋə, sə ku bɛɛ təntə kúbè dàn ká gwəŋə. ¹⁹ Də bɛɛ nə gwəŋə, nə à yèé v wà gwəŋə, tə mɛ ya tutu. Yoo tə, ku nə dé lá, ku mù nə ya ka zìlí Yu *nii yìèn. ²⁰ Sə liù mama dàn ká lwàn v yiri tə, v nə yì, máná tə wa, Yu nə kúrí wá. ²¹ Yu nə kúrí mú, də n nə ya yonju, dàn ká pa ku yoo yì mú. Yá n dàn nə nì cwəŋə, sə n ma tunì n tiàn, sə n tì ka, n ma tunì n tiàn. ²² Yonju tə, Yuu-Tiu nə kúrí wá, sə v twá v nə, ku yonju tə kúbè tà yonju Yu yáá con Yuu-Tiu yiri. Mə ku yì nətu ku pa liù tə nə, v də nə tì v tiàn, yá Yu ga kúrí wá, sə v bà v twá v nə. Ku tíú jigə Zwezi-Kərisə yonju. ²³ Yu pìí v yè aba də kwənə tə nə dáá. Á dàn ya v mù nyièn. Á kúbè dànà ká pìí á jì ləzoni ywəŋə. ²⁴ À nubia-ba, sə á liù mama ya Yu yáá con, ndə nətu tə nə, v nə yì máná tə wa, Yu nə kúrí wá, v dàn ká lwàn.

Lià tə, ba nə wà swe tə yoo

(1 Piycə 4.7, Ebərə-ba 13.4)

²⁵ Síún nə, à wá swìn lià tə, ba nə wà swe tə yoo. Ku tà *Yuu-Tiu nə pun nə ku mù nii təntə, ku ya à tətə pubuŋa, à swìn á con. Yuu-Tiu nə dəri yinəgə zənzən tə pun á me, sə á pa cígá à sùràn tə nə, à nə yi pùé nədu tíú tə yiri.

²⁶ Á nəŋə ku tə, à nə buŋa də, ku ziən. Wuwalu tə yiri, ku nə wulə síún mánjá ka tə wa, ku ziən, sə liù mama ya lá, ndə n nə ya nətu. ²⁷ Də n nə jə bwàlú, n nə càrì, sə n swe, dân ká dugv wá. N nə kùb ba bwàlú jə, sə n ya lá nətu, n ba bwàlú càrì. ²⁸ N dân nə kùb twá ku nətu tə wa, n swe kan, n wà cuna fwa. Kacun tə də, v tə nə yəri bɛɛ, nə kùb twá ku nətu tə wa, v swe bɛɛ nə, v wà cuna fwa. Lià tə, ba nə swe duən nə, wá na càn zənzən. Yá à mù ya à pià, sə à ma cì á nə. Ku mù yiri nə à swìn, sə á dânà ká swe.

²⁹ À nubia-ba, à sugv tə dèñ nə ya mánjá tə, Yu nə pun nəba, kùb ba dáá. Ku mù yiri nə, ku nə zigi síún nə, sə ba tə, ba nə swe tə, dân ká vwa ba tiàn ba kana tə nə, ba doni Yu. ³⁰ Ba tə, ba nə kwi tə, sə ba ya, ndə ku tà ba kwi. Ba tə, ba nə jwɛ, sə ba ya, ndə ku tà ba jwɛ. Ba tə, ba nə yè wiən, sə ba də ya, ndə ba ba won jə. ³¹ Sə ba tə, ba nə tuŋa luu tùtùnnán tə, sə ba ya, ndə ba ba luu tùtùnnán tuŋa. Tia ka tə yuu wiən tə, nə nə na, tə wá lɛ. ³² À ba pià, sə twara jə aba. Liù tə, v nə wà swe, ku ya Yuu-Tiu tutuŋi tə twara nə yàá jə wá, də nətu tə, v nə wá ma poli Yuu-Tiu pùé nə. ³³ Kanbari mù ya luu wiən twara nə ja wá. U pià, sə v poli v kan tə pùé nə, v mù nə kùb pià, sə v poli Yu də pùé nə. ³⁴ U pubuŋa tə dân yàá jì bələ. Mə ku ya nətu kana tə də con. Kan tə, v nə ba barɪ ja, də kacun tə, v tə nə yəri bɛɛ, Yuu-Tiu tutuŋi tə cici twara nə ja ba. Ba pià, sə ba ya Yu nyiən, sə Yu nə tɪni ba yira tə də ba pubuŋa mama. Yá kan tə, v nə swe barɪ nə, v də ya luu wiən twara nə jə wá. U pià nətu tə, v nə wá twá, v ma poli v barɪ pùé nə.

³⁵ À nə swìn tə yìèn təntə á con, ku ya, sə tə san aba. Ku tà à pià, sə à kə aba yoo wa. Ku ya à pià, sə á tun won mama, ndə ku nə me, sə ku tun nətu Yu cwəŋə tə wa. Sə vaŋv dân ká ya lá, sə á ma marɪ Yuu-Tiu yira.

³⁶ À dàń pìà, sə à swìn bæe nə jə v kacun v nə pìà, sə v swe yoo. Dun don, bæe də v bwàlú wàá ba buŋa də, ku me, sə ba yá ba bwàlí tə. Yá ku kwa nə, ku wàá ku pin bæe tə ga buŋa də, ku ya yolwan, v tun v bwàlú tə yira. U fira nə jə wá zənzən, ku pa v wàri v píní, v nə na də v pìà, sə v swe v bwàlú tə, sə ba swe duən nə. Də ba nə swe duən nə ku tà cuna. ³⁷ Yá bæe tə wàá v kúrí v tì də, v bá swe v bwàlú tə də v waa mama. Də v nə jə v tìàn dìàn, də v nə ken v pubuŋa wa, də v mù də v bwàlú tə bá pèń duən nə, ku ziən, v nə wà v bwàlú tə swe. ³⁸ Ku yoo tə dàń pìà ku swìn də, bæe tə, v nə swe v bwàlú tə fwa yozəŋu. Bæe tə, v də nə ba v bwàlú tə swe, də nə kùb fwa yozəŋu v doni.

³⁹ Kan nə swe barı nə, v barı tə nə wà ti, v ba cwəŋə jə, sə v nan v va v swe barı don nə. Yá v barı tə dàń nə tıga, v jə cwəŋə, sə v pìí v swe barı don nə, v nə swə. Ku me, sə barı təntə də ya Kərisə liù. ⁴⁰ À mù pubuŋa wa, à yà wá swìn də, kan tə nə wà pìí v swe, v yà wá ja pupwən, v doni v nə pìí v swe. Mə à mù pubuŋa nə nətu, yá à də ga yèé də, Yu-*Siŋu tə wulə də nə.

8

Jonı diè nàŋú diŋə yoo

(1 Korəntə tìán 10.19-33, Romə tìán 14.13-23)

¹ Síún nə, à dàń pìà, sə à swìn nàŋá tə, ba nə ma fwa *jonı, ba pun wonwanu nə yuu wa. Ku yi cígá, á swìn, á wú: «Nə mama yèé cígá tə.» Yá ku yənu təntə nə yàá kə nəba fwiə wa. Yá sonu mù yi ku yàá pa, nə vəli yàá wuuu, Yu tutuŋi tə wa. ² Də liù nə fwa fwiə v bırı də, v mù yèé yìèn, ku nətu tə nə bırı də, v tə yəri yìèn tə, ndə ku nə me nətu. ³ Ku mù nə pin, liù tə, v nə swə Yu, Yu də yèé ku tíú yoo.

⁴ Ku nə yi nàŋú tə, ba nə ma fwa jonı, ba pun wonwanu nə yoo wa, nə

mama yèé də, luv wonwanu ya tutu. Nə ga yèé də, Yu cici nə ba don jə.

⁵ Llà duən biri də, wiən wulə lanworu tə wa də tia yuu wa, ba mù nə jùnì, ndə ba yia nə. Ku mù nə biri də, là duən con yia dáá, yun tián də dáá. ⁶ Nə mù yèé də, ku tà cígá. Nə yèé də, Yu ya nədu cici. U mù nə ya nə nyina. Yá u mù yiri nə nə wulə. U mù nə pin wiən tə mama wulə. Nə yèé də, *Yuu-Tiu də yi nədu cici. Ku mù nə yi Zwezi-*Kərisə. Wiən tə mama nə twá də wá tə ma wulə. U mù nə pin nə də wulə.

⁷ Llà tə mama pubuŋa tà nədu. Llà duən wulə á pwéré wa, ba nə mì wonwanan tə zənzən. Ku mù nə pin, ku tián təntə nə dí wonwanu nàŋú, ba waa con ba yáá píi ba buŋa də, wonwanu tə nə ya ba yu. Yá ba kùb ba diàn jə Yu cwəŋə tə wa, ku jigə cuna ba waa con. ⁸ Nə mù yèé də, ku tà wodiū nə wá pa nə yí Yu yira. Də nə nə dí ku, ku bá súrí nəba Yu yáá con. Nə nə kùb wà ku dí, ku bá mun nəba Yu yáá con.

⁹ Á dān nə zurə á yira, də á nə swə á jə cwəŋə, sə á dɔ won tə mama, á nə pià. Ku nə tà nətu, Kərisə là tə, ba nə ba diàn jə Yu cwəŋə tə wa, wá twá á nə, ba ma dugv Yu cwəŋə tə ba jén. ¹⁰ À wá man ku nətu tə nəe, à biri aba. Də liù tə, u tə nə yəri Yu cwəŋə tə wa yièn təntə, u nə ni n mù liù tə, n nə yèé Yu cígá tə də, n jèñ wonwanan diè wa, n dé tə nàŋú, u də wá bún də, u də wàá ku u dé. ¹¹ Yá ku dān wá twá, də n mù liù tə, n nə yèé Yu cígá tə, liù tə don tə, u nə yi n nubiu Kərisə yiri, u nə yəri tə ma jén, Zwezi-Kərisə ga ti u də yiri. ¹² Də n nə fwa nətu, ku yi cuna nə, n fwa n nubia tə yira, ba nə ba diàn jə Yu cwəŋə tə wa. Ku yi n gugurə ba pubuŋa tə, ku cuna tə ga yi tə tégé n mù də Zwezi-Kərisə pwéré wa. ¹³ Ku mù yiri nə, də à nə wá dé wonwanu nàŋú, à nubiu don ga twá ku nə, u jén Yu cwəŋə tə wa, à kùb bá dé wonwanu nàŋú míámíán, sə ku pin nubiu don jén Yu cwəŋə tə wa.

Polə ba ɲwírán pià Yu tutuɲi tə wa

*(Likə 10.7, Galasi tián 6.6, 1 Timote 5.17-18, 2 Korentə tián 11.7-12,
Tòtònán 20.34-35)*

¹ Á tətə yəə də, à mù Polə yi liù tə, à nə ti à tián. Á yəə də, à yi Zwezi-*Kərisə *tuntunu. À cígá nɪ nə *Yuu-Tiu Zwezi à yii wa. Cígá mama, à tutuɲi tə, à nə tun à pa Yuu-Tiu nə tə, nə pɪn á ma yi Yuu-Tiu Kərisə lià.

² Də lià duən nə swə ba swìn də, à tà Zwezi-Kərisə tuntunu, á mù yəə də, à yi Zwezi-Kərisə tuntunu. Á mù yi mɪmɪnu, ku nə bɪrɪ də, à yi Yuu-Tiu tuntunu.

³ Mə ku mù yoo təntə à yàá ma le lià tə, ba nə cəgə nə tə. ⁴ Cígá mama à jə cwəɲə, sə à jon à nii wodiu də won tə, à nə wá nyun á con, à tutuɲi tə yɪrɪ. ⁵ Cígá mama à jə cwəɲə, sə à də swe kan lià tə wa, ba nə yi à nubia Kərisə yɪrɪ. Yá à də də à kan tə yà wàá nə twá tɪn tə wa nə vɛli, ndə Yuu-Tiu nubia tə, də v tuntuna tə duən nə, ndə Sefasə*fɪ* nə. ⁶ Cígá mama, ku yi à mù də Barənbasə cɪcɪ nə ba cwəɲə jə, sə nə ma nɪ nə nii wodiu, də ku nə tà nə tun də nə jìàn naaa? ⁷ Á tə nɪ pamanu, də ba nə ba v nii nə lɪ, v ga vɛlə kùù naaa? Á tə nɪ valu, də v varɪ kárá, ka wiən bɪ, yá v ga ba tori jə ka wiən tə tə wa naaa? Á tə nɪ liù, də v cì vàná nə, yá v ga ba tə yɪla kaɲa v nywin naaa? ⁸⁻⁹ Ku tà ləzoni pubuɲa nə, à ma swìn yìèn təntə. Yu *nii tə, v nə pɪn *Moyizə nə saga tə də tətə swìn tə yìèn təntə. Ku púpúní saga təntə wa də, mánjá tə wa, n nə jə nau, n ma tuɲa n fuv, ku wà mɛ, sə n vwa ku nii nə, ku dân ká dɪɲi wobia tə. Ku sugu təntə pià ku bɪrɪ də, nɪan yoo yì Yu naaa? ¹⁰ Ku sugu təntə tà nə mù Zwezi-Kərisə tuntuna tə yɪrɪ nə, Yu swìn ku naaa? Awo, ku ya nə mù yɪrɪ nə, Yu swìn ku. Liù nə varɪ kárá, v yàá jə yala də, v wá na v tori ka wodiu tə wa. Liù nə cèrì mɪna, v də yàá jə yala də, v wá dé tə wodiu. ¹¹ Nə mù nə ken Yu sugu tə á pubuɲa wa, ndə ba nə dùè wodwii kárá wa. Á buɲa də, ku yà wà mɛ, sə á

mù nè lɪ nè nii nè naaa? ¹² Də lìa duən nè jonə ba nii wodiɯ á jìàn wà, nè mù yà nè mɛ, sə nè na nè nii wodiɯ á con, nè doni kɯ tiàn tə. Nə mù ga wà aba lòrì, sə á ŋwín nèba won mama wà. Yá nè yà mɛ, sə nè pa á ŋwín nèba. Nə sè nè dó càn tə mama, sə nè dàn ká fwa won, kɯ nè wá cì á nè, sə á nì Zwezi-Kərisə suywánú tə. ¹³ Á yèé də, lìa tə, ba nè tuŋa Zwifə-ba Yu *dìè tə wà, ba nii wodiɯ naŋa tutuŋi tə wà, ba nè tuŋa. Á ma kúbù yèé də, Yu *jonwana tə, ba nè gwi vana tə, də yàá lɪ ba tori *joni tə nàŋú tə wà. ¹⁴ Nə də con nè, mə kɯ yɪ nətɯ. Yuu-Tiu də pɪn nii, sə lìa tə, ba nè swìn ɯ suywánú tə, na ba nii wodiɯ kɯ tutuŋi təntə wà.

¹⁵ Də kɯ nətɯ tə mama, à mù wà aba lòrì, sə á lɪ à nii nè. À nè púpúní kɯ nətɯ tə, kɯ tà à wú á dàn pian won bà, kɯ pa nè. À ba pià, sə liù mun à dun tə, à nè jə tə. À nè tɪga, kɯ kukwa, də à nè bwe won bwia á con.

¹⁶ Won tə, kɯ nè pa à swìn suywánú tə, kɯ tà won tə à nè wàá à ma fwa fwia. Kɯ ya Yu tətə nè kálí nè, sə à swìn suywánú tə. Də à nè wà kɯ swìn, kɯ ya càn nè wá yí nè. ¹⁷ Yu suywánú tə ya à yuu zɪlɪ Yu pɪn nè. Kɯ tà à tətə nè kúrí kɯ à tiàn nè. Kɯ yà nè yɪ à tətə nè kúrí à tì, sə à swìn Yu suywánú tə, à yà wá jon ŋwírán kɯ yɪra. ¹⁸ Bèè dàn nè yɪ à ŋwírán kɯ tutuŋi təntə wà? À ŋwírán nè ya, sə à swìn suywánú tə, à pa lìa nè tutɯ. À dàn ká bwe ba à ŋwírán bwia.

¹⁹ À mù Polə tɪ à tiàn liù mama yáá con. Yá à tətə nè tì à tiàn, à ma fwa lìa tə mama yonɯ. À fwa nətɯ, sə à twá kɯ nè, à van lià zənzən à pa Zwezi nè. ²⁰ Máná tə wà, à də *Zwifə-ba nè wulə duən nè, à yàá lwàn à jì ndə ba nè, sə à ma wàní ba à van à pa Zwezi nè. À yàá fwa kɯ nətɯ, yá Yu *nii tə, ɯ nè pɪn *Moyizə nè tə ga kúbù ba diàn jə à yuu wà. Də à nè fwa kɯ, kɯ yɪ à pià, sə à van Zwifə-ba Yu nii tə, ɯ nè pɪn Moyizə nè tə wà, à pa Zwezi nè. ²¹ À nè kúbù wulə lìa tə, ba nè yəri Yu nii tə, ɯ nè pɪn Moyizə nè pwéré wà, à yàá fwa ndə à də yəri kɯ, sə à ma wàní ba à van à pa Zwezi nè. À nè fwa kɯ nətɯ tə, kɯ ba pià kɯ swìn də, à ba Yu nii tə, ɯ nè pɪn Moyizə nè zìlí. À

zìlí Zwezi-Kərisə nii zəni. Ku yi à fwa ku, sə à ma van lià tə, ba nə ba Yu nii tə, v nə pɪn Moyizə nə jə, à pa Zwezi nə. ²² À nə kúù wulə də lià tə, ba nə tə ba diàn jə Yu cwəŋə tə wa, à yàá jì ndə à də ba diàn jə, sə à ma wàní ba à van à pa Zwezi nə. Də lià nə swə, ba yi nətu mama, à yàá jì ndə ba nə, sə à ma wàní à twá yiri mama nə, à ma van ba duən, sə Yu jon ba ba cuna wa. ²³ À fwa wiən tə mama Yu suywáŋú tə yiri, sə à ma wàní tori à na Yu con.

(2 Timote 2.3-6, 4.5-8)

²⁴ Á yèé də, lià nə pià, sə ba dəri dəru, sə ba jon ŋwírán. Ba mama yàá dəri cígá, ku dàń nə ya ba wa liù nədu tə, v nə wá dəri v lə ba duən tə, nə wá na ŋwírán tə. Á dàń kəni diàn, ndə lià tə nə, ba nə dəri tə, sə á də wàní ŋwírán á na. ²⁵ Lià tə mama, ba nə pià, sə ba dəri dəru ba jon won, ba yàá dí yàá ba cì ba tiàn nə də wiən tə, ba nə swə, yá tə ga ba ziən də dəru tə. Ba fwa nətu, sə ba ma na jala yupuu dəru tə wa. Yá yupuu təntə ba dání, ku ma kwɪn. Nə mù dəru tə wa, Yu wá pa nəba yupuu tə, ku nə bá kwɪn, abada. ²⁶ Ku mù nə pɪn, à mù ma dəri Yu nyiən tə wa, sə à yí ku yígúré. À tə yi ndə liù tə nə, v nə mà cwàrí. À ba à cwàrí tə mà woru wa. ²⁷ À kəni càn à tətə yura tə nə, sə ku pa à wàní à tiàn à ja, sə à mù liù tə, à nə swɪn Yu sugu tə, à biri lià nə, Yu dàn ká vi nə v dugu.

10

Won tə, Yizərayelə lià tə nə fwa, ku nə kàrì nəba

(Ebərə-ba 3.7-19)

¹ À nubia-ba, à mù Polə pià, sə á lií ku tə, ku nə tun mágá tə wa, nə nɪbara*f1*, ba nə wulə *Moyizə kwa, kasɔɔ lanworu tə wa. Bakwan tə yà nə púó ba mama míámíán yuu nə, ba ma vəli. Ba mama nə vəli ba ben munaa nəsiən tə. ² Ba mama tə yà yi ndə ba ləgə ba bakwan tə də munaa tə

wa, sə ku pa, Moyizə ya ba yuu tíú. ³ Ba mama dí wodiú tə, ku nə nan Yu con. ⁴ Ba mama nə nyua níá tə, Yu nə pín tə nan pìù tə wa. Ku pìù tǝntǝ yǎ yǐ Zwezi-**Kərisə*, nə vǝli də ba. ⁵ Yǎ də ku nətu mama ba wa liǎ zǝnzǝn wǎ Yu pùé poli. Ku mù nə pín, ba tǐ ba zwe kasɔɔ lanworu tə wa.

⁶ Ku nətu tə pǐǎ ku buri nəba də, ku ba ziǝn, sə nə pa nə pùé yokukwɪnan fira zu nəba, ndǝ tə fira nə zua ba nətu. ⁷ Ba wa liǎ duǝn yǎ yǐ wonwanan nə ba pín dun, ba ga dugu Yu vǎn nə. Ku yǎ yǐ, ndǝ ku nə púpúní Yu sagǐ tə wa, ku wú:

«Liǎ tə jǝn duǝn yǎǎ nə, ba dé wodiú, ba nyun ba sú. Ku kwa nə, ba zǎn, ba wulǝ ba sɛ.»

⁸ Ba wa liǎ duǝn də yǎ pǝní duǝn vɛɛ vɛɛ. Ku mù nə pín, ba wa liǎ mùrǝ sapua də batwa (23 000) twǎ duǝn, ba tǐ dun nədu. Nə mù dân kǎ cwǎrǐ də duǝn ndǝ ba nə. ⁹ Ba wa liǎ duǝn də pǐǎ **Yuu-Tiu* nii nə. Ku mù nə pín, dǐja tə ma dǐjǐ ba, tə gu. Nə mù dân kǎ pǐǎ **Yuu-Tiu* nii nə, ndǝ ba nə.

¹⁰ Ba wa liǎ duǝn də ɲuɲwɪn Yu. Ku mù nə pín, Yu **malika* tə, ka nə cùgǎ liǎ tə bà, ka gu ba. Á mù dânǎ kǎ ɲuɲwɪn Yu, ndǝ ba nə. ¹¹ Tǎ mù yǐǝn tǝntǝ mama fwa ba, sə ba duǝn twǎ tə nə, ba ma lwari. Ba púpúní tə ba tún Yu sagǐ tə wa, sə tə kǎrǐ nə mù liǎ tə, nə nə wulǝ luu talíkwa máɲǎ tə wa.

¹² Ku mù yǐrǐ nə, liù tə, u nə buɲa də, də u zǐga yu nə Yu cwǝɲǝ tə, sə u cǐ u tiǎn nə, u dân kǎ dugu Yu cwǝɲǝ tə. ¹³ Yoo tə mama ku nə dǎdǎn aba, sə ku yigu aba ku pa á tun yokukwɪn, ku dí yǎǎ ku dǎdǎn liǎ duǝn də. Yu yǐ pùé nədu tíú, u bá sɛ, sə yoo mama, ku nə dwǎ á diǎn dǎdǎn aba, sə ku yigu aba ku pa á tun yokukwɪn. Yu wǎ pa aba diǎn, sə á ma nan ku wa, ku dân kǎ doni aba, sə ku pa á wǎní á píní ku.

Á cia á tiǎn nə də wonwanan tə

(2 Korǝntǝ tiǎn 6.14-18, 1 Korǝntǝ tiǎn 8, Romǝ tiǎn 14.13-23, Apokalisa 2.14)

¹⁴ À nubisoni-ba, ku mù nè pɪn, á dàń dɔga ka pa dun wɔŋwanan nè tɛ míámíán. ¹⁵ À yɪ à swìn á mù lià tɛ con, á nè jɛ pubɔŋa, sɛ á tɛtɛ lwarɪ ku tɛ, à nè swìn tɛ. ¹⁶ Zwezi-*Kərisə jana tɛ lwá nè yɪɪ v tian tɛ wa. Yá diven wùrú zuŋa tɛ, nè nè yàá bwɪ Yu nè, dɛ nè nywɪn tɛ yɪ, sɛ ku ma bɪɪ dɛ, nè mù dɛ Zwezi-Kərisə jɛ *nimaru v jana, tɛ nè lwá tɛ yɪɪ. Dipen tɛ, nè nè yàá fu nè tarɪ duən, nè dɛ tɛ yɪ, sɛ ku ma bɪɪ dɛ, nè mù dɛ Zwezi-Kərisə jɛ nimaru v yura tɛ yɪɪ, ku nè cùgù v tian tɛ wa. ¹⁷ Dipen tɛ yɪ nɛɖu, nè mù ga dáá, yá nè ga dɛ ku dipen nɛɖu tɛntɛ. Ku nɛɖu tɛ bɪɪ dɛ, nè yɪ ndɛ won nɛɖu nè.

¹⁸ Á buŋa *Yɪzərayelə lià dwíí tɛ yoo. Ba lià tɛ, ba nè yàá gwɪ vɛnɛ tɛ Yu *jɔŋɪ kúrí tɛ yuu wa ba pɪn Yu nè tɛ, yàá dɛ nàŋú tɛ vɛn don. Yá ku nɛɖu tɛ pìà ku bɪɪ dɛ, ba mù dɛ Yu marɪ duən nè. ¹⁹ Ku nɛɖu tɛ ya à pìà à bɪɪ dɛ, wɔŋwanu tɛ dɛ ku vanu tɛ mɛ ba funə jɛ. ²⁰ À dàń swìn á con dɛ, ku tɛ, ba nè yàá gu wɔŋwanu tɛ nè, ku ya ba gwɪ *zinə nè, ku tà Yu nè. Yá à ba pìà, sɛ á mù dɛ zinə marɪ duən nè. ²¹ Á ba cwəŋə jɛ, sɛ á nyun zinə diven wùrú zuŋa tɛ, sɛ á tɛ nyun *Yuu-Tiu dɛ diven wùrú zuŋa tɛ. Á ma kùù wàri wodiu tɛ, ba nè pɪn zinə nè, á dɛ, sɛ á tɛ dɛ Yuu-Tiu dɛ wodiu tɛ. ²² Dɛ nè nè fwa ku nɛɖu, ku yɪ nè pìà, sɛ Yuu-Tiu wɔgwɪ zàn naaa? Á buŋa dɛ, nè diàn dwə wá naaa?

²³ Cwəŋə wulə, sɛ ba fwa won mama. Ku ya cígá, ku dàń nè tà wiən tɛ mama, ba nè fwa nè jɛ nywarɪ tɛ pa aba. Cwəŋə wulə, sɛ ba fwa won mama, yá wiən tɛ mama dàń nè ba nèba saŋa, sɛ ba bori Yu nyiən tɛ wa. ²⁴ Sɛ liù mama dàń pìà ku tɛ, ku nè saŋa v duən tɛ nè. U dàn ká pìà ku tɛ, ku nè saŋa v tɛtɛ nè. ²⁵ Á díé won tɛ mama, ba nè yoli yəə wa, á dànà ká bún yoo mama, ku yoo wà mɛ, sɛ ku zu á pubɔŋa wa. Á dànà ká bwe yoo mama. ²⁶ Ku púpúní Yu sagɪ tɛ wa, ku wú:

«Tia dɛ ku yuu wiən tɛ mɛ yɪ Yuu-Tiu nè ti ku.»

²⁷ Dɛ liù nè tà Kərisə liù, yá v bon aba, sɛ á dɛ dɛ duən, á nè vɛli, sɛ á dɛ

ku tə mama, ba nə tún á yáá con. Á dànà ká bún yoo mama, ku yoo wà mɛ, sɛ ku zu á pubuŋa wa. Á dànà ká bwe yoo mama. ²⁸ Lìù dàn nɛ swìn á con, v wú: «Won ku tə yi ba gua woŋwanu nɛ», á dànà ká dé ku lìù tə yiri, v nɛ dí yáá v swìn ku n con də, ku yoo tə nɛ wá zu v pubuŋa tə wa yiri. ²⁹ Ku tə, à nɛ swìn yəbə, ku tà á tətə pubuŋa tə, nɛ wá gugurə tə yoo, ku ya lìù tə don tə pubuŋa tə nɛ wá gugurə tə yoo. Bèè yiri nɛ lìù don pubuŋa dàn ma mɛ, sɛ ku buri à bura ku tə yiri, à nɛ ti à tiàn à ma fwa? ³⁰ À ken Yu lèè à wodi u tə yiri, à nɛ dó. Bèè nɛ pɪn, lià duən tə cəgə nɛ, ku wodi u tə yiri, à nɛ ken Yu lèè?

³¹ À sugu tə dàn pià, ku buri də, ku nɛ yi á wodi u diŋə wa, nɛ à yèé ku tə, á nɛ nywìn, nɛ à yèé ku tə mama, á nɛ fwa, á fwa ku, sɛ á pa Yu na dun ku wa. ³² Á dànà ká ya lià tə, lià duən nɛ wá zigi á yuu wa ba tun cuna, ku nɛ yi *Zwifə-ba, nɛ à yèé *Gərekə-ba, nɛ à yèé Kərisə lià púlí tə. ³³ À də yi à fwa won mama à pià, sɛ ku poli lià tə mama pwí nɛ. Ku tə à nɛ pià, ku tà à cici sánjú nɛ à pià. Ku yi lià kapupu sánjú nɛ à pià, sɛ Yu jon ba ba cuna wa.

11

¹ À dàn kwè aba, sɛ á fwa ndə à nɛ, ndə à də nɛ fwa ndə Zwezi-Kərisə nɛ.

Bɛɛ də kan nɛ mɛ, sɛ ba jèh nɛtu Yuu-Tiu yáá con

(1 Korentə tìán 14.40, Efɛzə tìán 5.22-24, 1 Timote 2.8-14)

² À bwi á nɛ də, á tə nɛ líí à lié yoo mama wa, á ga twá à kàrà tə nii nɛ, ndə à nɛ kàrì aba nɛtu. ³ À dàn pià, sɛ á lwarɪ yoo ku tə. Zwezi-*Kərisə nɛ wulə bɛɛ mama yuu wa. Bɛɛ də nɛ wulə v kan yuu wa. Yá Yu də nɛ wulə Zwezi-Kərisə yuu wa. ⁴ Bɛɛ tə mama, v nɛ jùná Yu, nɛ à yèé v nɛ swìn Yu *nii sùràn, v ga pú won v yuu nɛ, ku yi v mun v Yuu-Tiu. ⁵ Kan tə mama, v də nɛ jùná Yu, nɛ à yèé v nɛ swìn Yu nii sùràn won, ga wà v yuu nɛ pwí,

ku yi v mun bæe tə, v nə wulə v yuu wa. Yá ku cavira tə yi, ndə ba nə pàrí*fl* kan yuu nə. ⁶ Də kan nə wà won v yuu nə pwí, sə v gian v yukuran tə. Də ku nə yi cavira ku pa kan nə, sə v pa ba gian v yukuran, nə à yèá, sə v pa ba pàrí v yuu, v mɛ, sə v pú won ku nə. ⁷ Bæe yi Yu nyinyiga də Yu dun, ku mù nə pín, v wà mɛ, sə v pú won v yuu nə. Kan də con, v də yi bæe dun. ⁸ Yu lí won bæe yira, v ma fwa kan. Yu wà won lí kan yira, v ma fwa bæe. ⁹ Yu wà bæe fwa kan yiri, yá ku ya v fwa kan bæe yiri. ¹⁰ Ku mù nə pín, kan mɛ, sə v pú won v yuu nə, sə ku biri də, v jə nii Kərisə lià púlí tə wa, *malíke tə yiri.

¹¹ Yuu-Tiu yáá con, kan ba v tiàn ti, bæe nə ti wá. Bæe də ba v tiàn ti, kan nə ti wá. ¹² Ndə nətu tə, Yu nə lí won bæe yira, v ma fwa kan, mə nətu nə bæe yi kan nə yáá líri wá. Yá tə mɛ yi tə naŋa də Yu. ¹³ Á tətə buŋa ku, á jən ku zian, sə kan jun Yu, v ga ba won v yuu nə pwí naaa? ¹⁴ Nətu tə, Yu nə fwa won mama, tə nə biri də, bæe yukuran nə dara zənzən, ku jə cavira. ¹⁵ Yá ku lwàń, ku ya dun ku pa kan nə, də v yukuran nə dara. Kan mù con nə, Yu pín wá yukuran tə, sə tə pú v yuu nə. ¹⁶ Də liù nə ba ku swə, v nə tótòní, nə mù ba yofwamiwn təntə jə. Yu lià púlé tə də ba ku yofwamiwn təntə jə.

Nətu tə, nə nə mɛ, sə nə dé Yuu-Tiu nimaru wodiú tə

(Matia 26.26-28, Marəkə 14.22-25, Likə 22.19-20)

¹⁷ À nə pín nii ku tə, won tə, à nə bá bu á nə ku yiri, ku mù nə yi á nə yáá jèn duən nə Yu lià púlí tə wa, ku ba aba lwàńí, sə á jì zəni. Ku yáá kwen ku cùgà aba. ¹⁸ Təntən yoo, à nèn də, ba swìn də, á nə jèn duən yáá nə *Kərisə lià púlí tə wa, á yáá pwè púlé púlé də duən. À buŋa də, ku vən don wàá cígá ku yaní. ¹⁹ Ku mɛ, sə pwia cígá ya á tətəŋi wa, sə ku pa ba lwarí lià tə, ba nə twá Zwezi cígá cígá á tətəŋi wa. ²⁰ Ku biri də, á nə yáá jèn duən yáá nə, cígá mama ku tà *Yuu-Tiu *nimaru wodiú tə á pìà á dé. ²¹ Á liù mama

yàá dí yáá v dé v tətə wodiū. Ku mù nə pun, niən yàá jə liù don, yá liù don ga nyun, v bubunl. ²² Ku yi á ba diì jə, á nə wá dó á wodirən tə lá, də á nywin á swana tə tə wa naaa? Ku yi Yu lià púlí tə nə á pià, sə á mun. Yá ku yi cavira nə, á kəni ba tə nə, ba nə ba won mama jə. Á buŋa də, à wá bu á nə ku yoo təntə yiri naaa? Abada, à bá bu á nə.

²³ À mù jon Yuu-Tiu sèràn tə, à swìn á con.

Dun tə, ba nə jun Yuu-Tiu Zwezi tə, ku titun nə, v tì dipen, ²⁴ v kə Yu lèè ku yiri. Ku kwa nə, v fua fua ku, v ga swìn, v wú: «Ku yi à yira tə nə, á mù yiri. Á dàń fwa ku nətu tə, á ma líí à yoo.» ²⁵ Ba nə kúù dí wodiū tə, v zwè, v kúù tì diven wùrú zuŋa wa, v ga swìn, v wú: «Diven ku tə wùrú zuŋa ka tə wa nə yi à jana tə, tə nə yi Yu *nimardun tə. Á fwa ku nətu, sə á ma líí à yoo, mánjá tə wa, á nə wá nyun ku.» ²⁶ Yá mánjá mama, á nə dí dipen ku tə, á nə nyua wùrú zuŋa ku tə diven tə, ku yi Yuu-Tiu tian tə yoo nə, á biri wuuu. Á fwa ku nətu tə, ku jə vələ mánjá tə wa, Yuu-Tiu nə wá pìi v bà.

²⁷ Ku mù nə pun, liù tə, v nə dí ku dipen təntə, v nə nyua Yuu-Tiu diven tə, yá v ga wà mə, sə v fwa ku, bura wulə ku tíú yuu wa, Yuu-Tiu yira tə də v jana tə yiri. ²⁸ Liù mama dàń mə, sə v dé yáá v zən v tiàn, sə v ma dó ku dipen təntə, sə v ma nyun ku diven təntə. ²⁹ Liù tə, v nə dí ku, v nə nyua ku, v ga wà Zwezi yira tə zílí, v tətə nə wá pa Yu kə wá càn wa. ³⁰ Ku mù nə pun, labwana də yayiŋa ma dáá zənzən á tətəŋi wa, yá á wa lià duən də ga ti. ³¹ Də nə nə bùrì nə tətə bura nə tiàn nə, bura kúù bá ja nəba. ³² Də Yuu-Tiu nə ken càn nə nə, mánjá tə wa, ku yi v pià, sə v ma li nəba yoo wa. U pià, sə dun tə nə, v nə wá bùrì lià tə mama bura tə, v dàn ká kə nə mù də lià tə mama, ba nə yi luv nə ti, càn wa. ³³ À nubia-ba, ku mù yiri, mánjá tə wa, á nə jèé duən yáá, sə á dé Yuu-Tiu nimaru wodiū tə, sə á diàn duən. ³⁴ Də niən nə jə á wa liù, sə v dé wodiū v sàń nə, sə ku dàn ká pa á jèń

duən nə, á ma pa Yu bòrì á bura.

À wá le á yìèn tə duən tə, mánjá tə wa, à nə wá bà á con.

12

Yu tarpɔn tə, v nə pɔn Kərisə lià duən nə

(Efɛzə tián 4.6-12, 1 Piyerə 4.10-11, Filipə tián 2.1-4)

¹ À nubia-ba, ku nə yɪ Yu-*Siŋu tarpɔn tə yoo wa, à pià, sə á nì ku dèñ zəni. ² Á yèé də, mánjá tə wa, á yà nə yəri Zwezi-*Kərisə, woŋwanan tə, tə nii nə ba swìn nə yugə aba, tə ga dé diàn á yuu wa, sə á pú tə kwa á jùnì tə. ³ Ku mù yiri nə, à swìn á con də, liù wàrì v swìn də, Zwezi ya *Yuu-Tiu, də ku nə tà Yu-Siŋu tə nə biri ku wá. Ku mù nə pɔn, də liù mama wàrì v twá də Yu-Siŋu tə, v ma swìn v pɔn Yu cùgà Zwezi.

⁴ Yu-Siŋu tarpɔn yirə yirə dáá, yá Yu-Siŋu tə yɪ nədu ku nə pɔn tə.

⁵ Tùtònán yirə yirə dáá, yá Yuu-Tiu tə mù yɪ nədu, ba nə tuŋa tə ba pɔn wá.

⁶ Yìèn yirə yirə dáá tə nə tuŋa, yá ku yɪ Yu nədu tə nə pɔn diàn yirə yirə lià tə nə, ba ma tuŋa tə. ⁷ Yu-Siŋu tə yàá biri ku tiàn liù mama nə, sə v wàní v san ba duən tə nə. ⁸ Ku mù nə pɔn, Yu-Siŋu nədu tə yàá pa wubuŋa sùràn liù don nə, ku ga pa v don də nə yənu sùràn. ⁹ Ku mù Yu-Siŋu nədu tə yàá pa liù don nə, sə v wàní v kə waa Zwezi nə də cígá cígá. Ku ga pa v don də nə tarpɔnan, tə nə zwè yayıran. ¹⁰ Ku mù Yu-Siŋu nədu tə yàá pa liù don nə tarpɔn, sə v ma fwa tùtònà, tə nə biri Yu diàn tə. Ku pa v don nə tarpɔn, sə v ma jon Yu *nii sùràn v swìn. Ku pa v don nə tarpɔn, sə v ma lwari sugv tə, ku nə yɪ Yu-Siŋu tə sugv, də ku tə nə yɪ *zinə sùràn. Ku mù Yu-Siŋu nədu tə yàá pa liù don nə tarpɔn, sə v swìn suyirə duən, ku pa v don nə tarpɔn, sə v ma gwin tə suyirə tə dèñ. ¹¹ Yu-Siŋu nədu tə tətə nə tuŋa tə yìèn təntə mama. Ku mù nə tarɪ ku pɔn liù mama nə, ndə nətu tə nə, ku nə pià.

Yıra nədu də ku nandaran, tə nə dáá

¹² Nə yəə də, yıra yı nədu, yá ku ga ja nandaran, tə nə dáá zənzən. Yá nandaran təntə nə dáá nətu mama, tə mù nə ken duən nə, tə ma fwa yıra nədu tə. Mə ku ya nətu Zwezi-**Kərisə* də con. ¹³ Yá ku dān nə yı **Zwifə*-ba, nə à yəə ba tə, ba nə yı də **Gərekə*-ba, də ba tə, ba nə yı ywəŋə, nə à yəə ba tə, ba nə tı ba tiàn, ba ləgə nə mama Yu-**Siŋu* tə wa, sə nə wàní nə ya won nədu. Nə mama súə də Yu-*Siŋu* nədu tə. ¹⁴ Yıra tà nandav nədu nə ku jə, ku yı nandaran, tə nə dáá, nə ku jə. ¹⁵ Də naa yà nə swìn də, ku tà jun, ku mù yırı nə, ku tà yıra tə nə tı ku, ku nətu wàrì ku pın naa kúbù tà yıra tə nandav. ¹⁶ Də zun yà nə swìn də, ku tà yii, ku mù yırı nə, ku tà yıra tə nə tı ku, ku nətu tə wàrì ku pın ku kúbù bá ya yıra yıra nandav. ¹⁷ Də yıra tə mama yà nə yı yii cici, ku yà wá fwa nətə, ku ma nì sùràn? Nə à yəə ku yà nə kúbù yı zun cici, ku yà wá fwa nətə, ku ma nì lwán? ¹⁸ Ku mù nə pın, Yu ma kə nandaran tə mama yıra wa, ndə v nə pià nətu. ¹⁹ Yıra ya wàrì lá ku yanı, də ku yà nə yı nandav nədu cici. ²⁰ Ku mù yırı nə yıra yı nədu, yá ku nandaran ga dáá. ²¹ Yii dān wàrì jun con ku swìn də, jun ba tutuŋı jə ku pa ku. Yuu də ma kúbù wàrì nəe con ku swìn də, nəe ba tutuŋı jə tə pa ku. ²² Nandaran tə tətə, tə nə yı ndə tə ba diàn jə, tə də jə tutuŋı yıra tə wa. ²³ Nandaran duən wulə yıra tə wa, ba nə buŋa də, tə ba dun jə. Yá ba yàá ywàŋá tə yoo zəni. Ku mù nə pın, nə nandaran tə, tə nə jə cavıra tə, nə yàá ywàŋá tə yoo zəni, nə doni. ²⁴ Yá nə nandaran tə, tə nə ba cavıra jə, tə mù ba pià, sə nə ywàń tə yoo nətu. Yu ken nandaran tə yirə yirə, sə ku pa nandaran tə, tə nə ba dun ja wàní tə na dun, tə doni tə duən tə. ²⁵ Ku yı nətu, sə yıra tə dān ká pwè duən nə, sə nandaran tə mama san duən nə. ²⁶ Yá də nandav nə wulə càn wa, sə tə duən tə twá tə ya càn təntə wa. Nandav don nə wulə dun wa, sə tə duən tə də twá tə jwe də ku. ²⁷ Á mama míámíán yı Zwezi-*Kərisə* yıra tə. Yá á liù mama dān ya yıra təntə nandav. ²⁸ Yu təntən v kə Zwezi-*Kərisə* **tuntuna* tə *Kərisə* lià púlí tə wa. Bələ nii nə,

u ken Yu nii *sùsùnà lá. Batwa nii nə, u ken karnyına lá. Ku zàn lá, ku pa ba tə, ba nə jə Yu tarpıun, ba ma tunja yomılan, tə nə bırı Yu diàn tə. Ku zàn lá, ku pa ba tə, ba nə zwè yayıran tə. Ku zàn lá, ku pa ba tə, ba nə saña lià nə. Ku zàn lá, ku pa ba tə, ba nə kəni lià cwəŋə wa. Ku zàn lá, ku pa ba tə, ba nə swın suyirə duən. ²⁹ Ba mama nə tà Zwezi-Kərisə tuntuna. Ba mama nə tà Yu nii sùsùnà. Ba mama nə tà karnyına-ba. Ba mama nə ba yomılan tə fwa, tə nə bırı Yu diàn tə. ³⁰ Ba mama nə ba tarpıun tə, ku nə zwè yayıran tə jə. Ba mama nə ba suyirə yirə tə swın. Ba mama nə ba suyirə yirə tə dən gwin. ³¹ Á kəni á kajaŋa á pià tarpınan, tə nə jə funə tə doni. Yá à dān wá bırı aba cwəŋə tə, ku nə ziən ku doni.

13

Sonu yoo

(Matia 22.36-40, Romə tian 13.8-10, 1 Zwan 3.16-19, 4.7-21)

¹ Də à nə swın ləzoni sùràn də *malike sùràn tətə, yá à ga ba sonu jə, ku ya tutu. Ku yi ndə lulonji zəzugu nə, nə à yèé ndə ba nə mà kwān ka zəzəgə nətu. ² À wàá tarpıun à nı, sə à ma swın Yu nii sùràn. À wàá wubunja à janı à ma lwarı yièn tə mama, tə nə sègè. À ma kùb wàá yənu yiri mama à janı. À ma kùb wàá à yanı liù tə, à nə kəni à waa Yu nə wuuu də cígá cígá, ku pa à wàá à pın pēen fàrí tə bwálá nə tətə. Yá à nə ba sonu jə, à tə ya tutu. ³ À nə kùb swə à tarı à jujə tə mama, à pa zura nə, à nə pın ba sùrí à yıra tə tətə mən wa, yá à nə ba sonu jə, ku tə ba funə jə ku pa nə.

⁴ Liù nə jə sonu, ku tíú jə pínú, u ga sú də ywání. Liù nə jə sonu, ku tíú ba liù don nə zıga u wiən yırı. Liù nə jə sonu, ku tíú ba ka bu tiàn nə jə. Liù nə jə sonu, ku tíú ba fwıə jə. ⁵ Liù nə jə sonu, ku tíú ba cavıra kəni liù don nə. Liù nə jə sonu, ku tíú ba u tətə zəni pià. Liù nə jə sonu, ku tíú ba lıŋa jə. Liù nə jə sonu, ku tíú ba yolwan tunjə u bican wa. ⁶ Liù nə jə sonu, ku

tíú yàá jwε cígá yoo yiri, ku tíú ba pupwən fwa kunkun yìèn yiri. ⁷ Lìù nə jə sonu, ku tíú yàá kwen yoo mama v lɪ v mù də là tà duən tə pwérə wa. Lìù nə jə sonu, ku tíú kəni v waa Yu nə yoo mama wa. Lìù nə jə sonu, ku tíú jə yala yoo mama wa. Lìù nə jə sonu, ku tíú jə pínú yoo mama wa.

⁸ Ka jon Yu nii sùràn, ka swìn wá zwè. Suyirə tə duən wá zwè. Yənu də ga wá jén. Lìù nə jə sonu, ku tíú sonu tə bá zwè, abada. ⁹ Ku nətv tə biri də, ku tà yìèn tə mε, nə nə yèé. Yá Yu nii sùràn tə, nə nə jonə nə swìn, ku tà tə mε, nə nə wàá nə swìn. ¹⁰ Máná tə wa, Yu nə wá biri nəba won mama nə yi nətv, wiən təntə, nə nə yèé síún nə, wá jén lá.

¹¹ Máná tə wa, à yà nə ya bisumaa, à yà swìn ndə bisumaa nə, à yà buɲa ndə bisumaa nə, à yà nèn yìèn tə dèñ ndə bisumaa nə. Máná tə wa, à dàñ nə jigə bεε, à dugv bisumaa yìèn təntə. ¹² Síún nə, ku yi ndə won nə, nə nə ywàñ zəɲə wa, ku ga tə yi gana gana. Dun don wá bà, nə nə wá na ku won tə nə yíá tətə wa. Síún nə, à tə yəri tə mama. Dun don nə, à wá yəni tə mama, ndə Yu nə yèé nə nətv. ¹³ Síún nə, yìèn batwa nə ga tə nə wulə wuuu. Tə mù nə yi, sə là kəni ba waa Zwezi nə wuuu, sə ba ja yala də Yu, sə ba sóní duən. Yá tə batwa tə wa, sonu tə nə dwə tə mε.

14

Yìèn tə, tə nə wulə Yu-Siɲu tarpɪvn tə wa

(1 Korəntə tìán 12.4-7, 27-31, Romə tìán 14.19)

¹ Á dàñ mε, sə á dó yáá, á sóní duən. Ku kwa nə, á pìà Yu-*Siɲu tarpɪnan tə. Tə mù tarpɪnan təntə wa, á pìà tarpɪvn tə, ku nə yi ka swìn Yu nii sùràn tə, á doni tə duən tə. ² Lìù tə, v nə swìn suyirə duən, ku tà ləzoni con nə, v swìn, ku ya Yu con nə, v swìn. Ku twá də Yu-Siɲu tə, v ma swìn cígá, tə nə sègè. Ku mù nə pɪn, liù mama ba tə sùràn tə dèñ nèn. ³ Yá ku nə lwàñ ku yi liù nə swìn Yu nii sùràn, ku mù yi ləzoni tə con nə v swìn. U sùràn tə daɲa

ba jìàn Yu cwəŋə tə wa, ʋ kwè ba, ʋ zùrì ba bicanɪ Yu nyiən tə wa. ⁴ Liù tə, ʋ nə swìn suyirə tə duən tə, ku ya ʋ tətə jìàn nə ʋ daŋa. Liù tə, ʋ nə swìn Yu nii sùràn, ku ya Kərisə lià púlí tə jìàn nə, ʋ daŋa. ⁵ À swə, sə á mama swìn suyirə tə duən tə. À dān nə kùb swə à doni, sə á mama swìn Yu nii sùràn tə. Liù tə, ʋ nə swìn Yu nii sùràn tə, nə dwə liù tə, ʋ nə swìn suyirə tə duən tə, də liù tə, ʋ nə swìn suyirə tə duən tə, nə ba tə dèñ gwin, ʋ biri Kərisə lià púlí tə, sə ʋ ma dān ba jìàn.

⁶ À nubia-ba, à nywarɪ nə wá ya bètətə, də à nə twi á con, à wulə à swìn suyirə duən, á nə ba tə dèñ nèn? À wá ja nywarɪ à pa aba, də à nə swìn yoo, Yu nə biri nə, à biri aba, nə à yèə yoo, Yu nə pin nə ku yənu, nə à yèə Yu nii sugv, nə à yèə kàrà. ⁷ Nə wá tì gwaran wiən, sə nə ma man. Ku mù nə yi nabwanv nə à yèə banv. Də tə kwərə tə nə ba lwàní duən wa, nətə nə ba wá twá, ba ma lwarɪ ku tə nə swìn. ⁸ Də ba nə kùb wúrí kùb nabwana gurə gurə, nətə nə kwatara wá fwa, ba ma lwarɪ də, ku yi kùb, sə ba kə ba sírí? ⁹ Mə ku yi nətə á də con. Də sugv tə, á nə swìn suyirə duən tə wa, ku dèñ nə ba nèn, nətə nə ba wá lwarɪ ku tə, á nə swìn. Ku nə yin nətə, á wá swìn woru wa. ¹⁰ Suyirə duən dáá tia yuu wa. Yá suyiri mama təlɛ tə wa, ba nə ba ku dèñ nèn. ¹¹ Yá à dān nə ba sugv dèñ nèn, ba nə ma swìn à con, liù tə, ʋ nə swìn ku, wá ya ndə vee nə à con, à də ga wá ya ndə vee nə ʋ də con. ¹² Mə ku yi nətə á də con. Ku mù nə pin, á kənə kajaŋa mama á ma pìà Yu-Siŋu tarpunan tə. Á kənə diàn, sə á wàní á na tə tə, tə nə daŋa Kərisə lià púlí tə jìàn, sə tə ya zənzən.

¹³ Ku mù yiri nə, liù tə, ʋ nə swìn suyirə duən, tə dèñ nə ba nèn, sə ku tíú lòrì Yu, sə ʋ wàní ʋ gwin tə dèñ. ¹⁴ À nə jùnì Yu də suyirə təntə, à jèré wulə yijunɪ tə wa, yá à pubuŋa tə ga yi ku cici. ¹⁵ À dān wá fwa bè? À wá jun Yu də à jèré, yá à tə ga jun Yu də à pubuŋa tə də. À wá nun də à jèré, yá à tə ga nun də à pubuŋa tə də. ¹⁶ Də n nə kəni Yu lèè də n jèré cici, nətə nə liù tə, ʋ nə yəri tə yìèn təntə ʋ nə jèə á mù Kərisə lià púlí tə wa, wá twá,

u ma swìn, u wó: «Amuna», n nə kəni Yu lèè tə yurí? U bá wàní u lwarí ku tə, n nə swìn tə. ¹⁷ Də n yijuní tə yà nə zian zənzən, də ku wà liù təntə jìàn dàn. ¹⁸ À mù Polə, à kəni Yu lèè də, à nə swìn suyirə tə duən tə, à doni á mama. ¹⁹ À mù dàn nə swə, sə à swìn sùràn ndə bonu nə də à pubuŋa, tə dèñ nə nèn Kərisə lià púlí tə yáá con, sə tə kàrì ba. Ku mù nə dwə sùràn mùrù mùrù, à nə wá swìn də suyirə tə duən tə, yá tə dèñ ga ba nèn.

²⁰ À nubia-ba, á yaní nəkwina nətu tə á pubuŋa tə nə buŋa wa. Á dànà ká ya ndə bìsìná nə á pubuŋa wa. Ku nə yí lwaní yoo wa, á yaní ndə bìsìná nə. ²¹ Á nəŋə ku púpúní Yu sagí tə wa, ku wó:

«À mù *Yuu-Tiu nə swìn ku. Ku wá twá lià duən sùràn nə, à ma swìn lià təntə con. À wá twá də vee, à ma swìn ba con. Də ku nətu mama, ba tə bá sè, ba cugu à sugu.»

²² Suyirə tə duən tə ya lià tə, ba nə tà Kərisə lià nə, tə pià tə burí yoo. Tə ba pià tə burí yoo Kərisə lià tə nə. Yu nii sùràn tə də kùb ba pià tə burí yoo lià tə, ba nə tà Kərisə lià tə. Ku ya Kərisə lià tə nə, tə pià tə burí yoo. ²³ Də Kərisə lià púlí tə mama nə kun duən nə, ba swìn suyirə duən tə, liù tə, u nə yəri tə yìèn təntə, nə à yèé liù don, u nə tà Kərisə liù nə twi, u yí lá, u wá swìn də, á yí nyinyanan. ²⁴ Ku nə yí á mama swìn Yu nii sùràn, liù tə, u nə tà Kərisə liù nə twi, u yí lá, nə à yèé liù don, u nə yəri tə yìèn təntə, nə twí, u yí lá, á mama sùràn tə wá burí ku tə, ku nə wulə u waa con. Yá ba mama wá pa u lwarí cígá tə u tətə yuu wa. ²⁵ U waa tə pubuŋí tə, tə nə sègè tə, nan poni nə. Yá u dàn wá tu u yáá yuu, u pa dun Yu nə, u swìn də, Yu cígá wulə á tətəŋi wa.

Nətu tə ku nə me, sə ku ya Kərisə lià púlí wa

(1 Piyeŋə 4.10-11)

²⁶ À nubia-ba, bèè nə nə dàn me, sə nə fwa? Máná tə wa, á nə jèñ duən yáá nə, sə á jun Yu, sə á fwa nətən: Á liù nə jə nuŋə, u don nə jə kàrà, u

don də nə jə yoo, Yu nə biri wá, v don də nə pià, v swìn suyirə tə duən tə, v don də nə pià, v gwin suyirə tə duən tə dèń, sə á fwa tə mama, sə tə wàní tə dàn Kərisə lià púlí tə jìàn. ²⁷ Ku nə yi suyirə tə duən tə nə á pià á swìn, ku mɛ, də lià bələ, nə à yèó lià batwa, ku dàn ká doni nətɔ. Ba mɛ, sə ba swìn ba jon duən nə. Sə liù don də gwin tə dèń. ²⁸ Də liù nə tɛlə, sə v gwin tə dèń, sə liù tə, v nə swìn suyirə duən tə, pú v nii Kərisə lià púlí tə wa. Sə liù mama də swìn v tiàn con də Yu con. U dàn ká swìn sugu v pa ku nan v nii wa. ²⁹ Ku nə yi Yu nii *sùsùnà tə, sə ba lià bələ, nə à yèó batwa nə swìn. Yá ba duən tə ga cugu, ba jén, ku nə ya Yu nii sugu nə ba swìn. ³⁰ Liù don nə kùbè nɪ yoo, Yu nə biri wá, sə tɛntən liù tə pú v nii. ³¹ Á mama wàá Yu nii sùràn tə, á swìn, sə tə kàrì lià tə mama, tə ga kwè ba. ³² Yu nii sùsùnà tarpuɔn tə mɛ, sə ku sè ba nii won mama wa. ³³ Yu pià, sə nə jə bican sié də duən. U ba pià, sə nə ya gurə gurə lià də duən.

Kərisə lià púlí tə wa kana tə yoo

³⁴ Máná tə wa, á mù *Kərisə lià, tə nə kun duən nə, kana tə mɛ, sə ba pú ba níé, ndə ku nə tuɲa nətɔ Kərisə lià púlé tə mama wa. Cwəɲə tɛlə ku pa ba, sə ba swìn, ndə ku nə swìn Yu sagɪ tə wa, də ba mɛ, sə ba sè nii nətɔ. ³⁵ Də ba nə jə yoo, sə ba bwe, sə ba bwe ba bana tə sàń nə. Ku wà mɛ, sə kan swìn Kərisə lià púlí jéré wa. ³⁶ Á buɲa də, Yu sugu tə yi ku nan á mù con naaa? Nə à yèó ku yi á buɲa də, Yu sugu tə yi á mù cici con nə ku twi naaa?

³⁷ Liù tə, v nə buɲa də, v yi Yu nii *sùsùnù, v nə buɲa də, Yu-*Siɲu tə wulə də wá, sə ku tíú lwarɪ də, tə tə, à nə púpúní à pun aba, ku ya *Yuu-Tiu nə pun nii yoo tɛntə yuu wa. ³⁸ Də liù nə ba ku tə, à nə púpúní tə sè, Yuu-Tiu Yu də bá sè ku tíú. ³⁹ À nubia-ba, ku nətɔ tə wa nə, á dǎń mɛ, sə á dí yáá á pià ka swìn Yu nii sùràn tə. Yá á nə dàn ká cì, sə ba swìn suyirə tə duən tə. ⁴⁰ Ku mɛ, sə won mama fwa, ndə ku nə mɛ nətɔ, ku tì ku

cwəŋə.

15

Zwezi-Kərisə nə bwin v nan tian wa yoo

(Matia 28, Marəkə 16, Zwan 20, 21, Tùtùnnán 1.3)

¹ À nubia-ba, à pià, sə à pii à lií aba suywánú təntə, à nə dé yáá à swìn á con. Ku suywánú təntə á nə sè ku, á ga zigi diàn ku yoo wa. ² Ku mù nə pín, Yu twá suywánú təntə nə, v jon aba á cuna wa. Á cígá twá ku nii nə, ndə à nə swìn ku á con nətu. Ku nə tà nətu, ku ya tutu də, á nə ken á waa Yu nə.

³ À dí yáá à swìn *Yuu-Tiu Zwezi sùrán tə, à nə nì, à biri aba. Zwezi-*Kərisə yi v tiga nə mù cuna yiri, ndə ku nə púpúní Yu sagi tə wa nətu. ⁴ Ba gùrì wá, yá Yu pii v bwin wá dian batwa diun nə, ndə ku nə púpúní Yu sagi tə wa nətu. ⁵ U nan v biri v tiàn Sefasə*f1* nə. Ku kwa nə, v nan v biri v tiàn v *tuntuna fugə bələ tə nə. ⁶ Ku kwa nə, v nan v biri v tiàn lià duən nə, ba nə yi nubia Kərisə yiri. Ba lià təntə dwə lià biənu (500), ba nə twá duən, ba na wá naa nədu. Ba mù lià təntə zunı tə wulə luu wa. Ba duən də tiga. ⁷ Ku kwa nə, v nan v biri v tiàn Zwakə nə, v nan lá v biri v tiàn v tuntuna tə mama nə. ⁸ Ba mù tə mama kwa nə, v nan à də Polə nə. À mù dān yi ndə biú nə, ba nə cən*f1*. ⁹ À ken cən Kərisə lià púlí tə nə. Ku mù nə pín, à yi Zwezi-Kərisə tuntuna tə mε kwa liù. Ku cígá mama wa, à wà mε, sə ba bon nə tuntunu. ¹⁰ Də nətu tə mama, à nə cùgù Yu nə, v tə fwa pubwanu à yira. Ku mù nə pín, à ma yi ku tə, à nə yi zèn. Yá pubwanu tə, Yu nə fwa à yira, wà tutu yin mama. À tun à doni tuntuna tə duən tə mama. Ku tà à mù nə tuŋa nətu, ku cígá mama wa, ku ya Yu pubwanu tə, ku nə wulə də nə, nə twá də nə ku tuŋa. ¹¹ Ku dān nə yi à mù, nə à yèə ku nə yi tuntuna tə duən tə, á nəŋə Yu sugu tə, nə nə swìn nə biri.

Mə ku mù nə nə á twá, á ma kəni á waa Zwezi nə.

Nə ka pìi ka bwin ka nan tian wa yoo

(Likə 20.27-38, 1 Piyərə 1.3-5)

¹² Də ba nə swìn Yu sùràn ba buri də, Zwezi-Kərisə bwin v nan tian wa, bɛ̀ɛ nə pɪn, á wa lià duən ma swìn, də ka pìi ka bwin ka nan tian wa tɛ̀lɔ́? ¹³ Də ka bwin ka nan tian wa nə tɛ̀lɔ́, Zwezi-Kərisə də wà bwin v nan tian wa! ¹⁴ Yá Zwezi-Kərisə nə wà bwin v nan tian wa, nə kàrà tɛ̀ ya tutu, yá á nə ken á waa Yu nə tɛ̀, də ya tutu. ¹⁵ Də ka bwin ka nan tian wa yà nə tɛ̀lɔ́, yá nə ga swìn nə buri də, Yu bwin Zwezi-Kərisə v li tian wa, yá Yu ga wà wá bwin, ku nɛ̀tu tɛ̀ buri də, nə ya kunkuna Yu yáá con. ¹⁶ Də tɪga nə ba bwin ba naɲa tian wa, Zwezi-Kərisə də wà bwin v nan tian wa! ¹⁷ Yá Zwezi-Kərisə nə wà bwin v nan tian, á waa tɛ̀, á nə kəni wá nə ya tutu. Yá Yu tɛ̀ wà á cuna tɛ̀ kwɛn, v li á mù də wá pwérɔ́ wa. ¹⁸ Ba tɛ̀ də, ba nə ken waa Zwezi-Kərisə nə, ba ga ti tɛ̀ də jén míámíán. ¹⁹ Ku nə yi nə luu mu ku tɛ̀ cɪcɪ wa, nə nə jɛ̀ yala də Zwezi, nə ya yinəgə nyɪna, nə doni lià tɛ̀ mama.

²⁰ Ku tà nɛ̀tu, Zwezi-Kərisə cígá bwin v nan tian wa. U mù nə yi tɪga tɛ̀ tɛ̀ntɛ̀n liù, v nə buri də, ba wá bwin ba nan tian wa. ²¹ Ndə tian nə twá, də liù nɛ̀du tɛ̀ ma bà luu wa, mə nɛ̀tu, ka bwin ka nan tian wa də twá də liù don, ku ma bà luu wa. ²² Lià tɛ̀ mama ya Adamə nìán. Ku mù nə pɪn, ba mama ti ndə v nə. Yá lià tɛ̀ mama, ba də Zwezi-Kərisə nə vwə duən nə, ba də wá pìi ba bwin ba nan tian wa, ndə v nə. ²³ Ba mù lià tɛ̀ntɛ̀ wá pú duən kwa, ba bwin ba nan tian wa. Zwezi-Kərisə mù yi tɛ̀ntɛ̀n liù, v nə bwin v nan tian wa. Dun tɛ̀, v nə wá pìi v bà, lià tɛ̀ mama, ba nə yi v mù lià tɛ̀ də, dàń wá bwin ba nan tian wa. ²⁴ Ku kwa nə, luu dàń wá zɪgɪ lá ku zàn. Zwezi-Kərisə dàń wá cùgù wiən tɛ̀ nə jɛ̀ diàn yiri mama míámíán. U wá cùgù wiən tɛ̀ mama, tɛ̀ nə dɔ́ pàrì, də diàn tiàn tɛ̀ mama, ba nə zɪga v nə

míámíán. Yá v dàń wá pìí, v pa pàrì tə v nyuna Yu nə. ²⁵ Zwezi-Kərisə nə pìí v bà, ku mə, sə v dǎ pàrì tə wuuu. Ku jə vələ mǎǵá tə wa, v nə wá kə v duŋa tə mama v juun wa. ²⁶ Tian nə ya talíkwa duŋu tə, v nə wá cùgè.

²⁷ Ku púpúní Yu sagı tə wa, ku wú: «Yu ken wiən tə mama v juun wa.» Ku yoo tǎntə yi nəpon, ku ba pìà ku swìn də, Yu tətə twá v wulə v bìú tə juun wa. Ku yi, v mù Yu nə ken wiən tə duən tə mama v bìú tə juun wa. ²⁸ Mǎǵá tə wa, wiən tə mama nə wá ya Zwezi-Kərisə jìàn wa, v də tətə dàń wá kə v tiàn v nyuna Yu jìàn wa. Mə ku wá yà nətu, Yu dàń ma dǎ pàrì wiən tə mama yuu wa míámíán.

²⁹ Á yǎə də, lià wulə, ba nə yàá pa, ba lə ba níá wa, ku twá də Yu yırı tə, tıga yuu yırı. Də tıga cíǵá nə bá bwin ba naŋa tian wa, bè won nə ku tiàn tǎntə fwa ku nətu, sə ba na ku wa? ³⁰ Də ka pìí ka bwin ka nan tian wa nə tǎlǎ, bèè nə pın, nə mù ma kəni nə tiàn cwəŋə wa, ku nə pìà ku gu nəba, mǎǵá mama. ³¹ À nubia-ba, diun mama à mu yàá pìà ku nan. À ja pupwən də aba. Ku mù nə pın, à swìn ku yoo tǎntə á con, nə mù də nə Yuu-Tiu *nimaru tə yırı. ³² À mù jan də ganaŋa*f1* Efezə wa yəbə. Də à pubuŋa tə nə ya tia ka tə yuu wiən tə cıci yırı, bèwon nə à wá na ku jaŋa tǎntə wa? Də tıga yà nə bá bwin ba nan, zwansısara ka tə yà wá ya cíǵá. Zwansısara tǎntə swìn, ku wú:

«Jwıan nə, nə wá tı, ku mù yırı, nə díé də nə nywìn, nə dàn ká fwa won mama.»

³³ Zwansısara don də swìn, ku wú: «Á dànà ká gıgarı á tiàn. Twadon kukwiun yua nə cùgà twadon nəzəŋu yua.» ³⁴ Á pìé á kə á pubuŋa tə cíǵá tə wa, ndə ku nə mə nətu, sə á dàń yá cuna tə fànú nə. Ku yi á caviyoo nə à swìn nətu: Á wa lià duən yəri Yu.

Yıra tə tıga nə wá bwin ba nan də ku

(Filipə tiàn 3.20-21, 1 Zwan 3.2-3)

³⁵ À yèé də, lià duən wá bwe, sə ba jén, nətə nə tɪga wá bwin ba nan tian wa? Ba yura tə wá yà nətə? ³⁶ Liù tə, n nə bwe ku bwiə təntə, n yɪ ləyərɪ! N nə dùè wobiu, n kə tia, wobiu təntə wàri vuv ku bwin, də ku nə wà ti ku pu. ³⁷ Ku tə n nə dùè, n kə tia, tə ya wobiu cici. Dun don, ku yɪ mibia, nə à yèé won yiri don, ku tà mɪni sɪsɪv tə, də ku vuran tə, ku nə pɛn, ku dɪ yu nə tə. ³⁸ Yu nə yàá pa sɪsɪv də ku vuran wobiu təntə nə, ndə v nə pià nətɪ. Yu nə pɪn wobiu də mama ku vuv yiri.

³⁹ Wiən tə, tə mu nə siŋə, də yura tə tà nədu. Ləzoni yura də yiri yɪ ku cici. Vàná də yura yiri yɪ ku cici. Zəŋə də yura yiri yɪ ku cici. Filə də yura yiri yɪ ku cici. ⁴⁰ Lanworu tə wa wiən wulə lá, tə nə jə yura. Tia tə də yuu wa wiən wulə lá, tə nə jə yura. Lanworu tə wa wiən tə zəni, də tia yuu wiən tə zəni tà nədu. ⁴¹ Yɪcav tə zəni də yɪ ku cici. Cànà tə də zəni yɪ ku cici. Kacɪlace tə də zəni kùè yɪ ku cici. Kacɪlace tə mù tətə zəni tà nədu.

⁴² Mə ku wá ya nətɪ mánjá tə wa, tɪga nə wá bwin ba nan tian wa. Mánjá tə, ba nə gùrɪ yura tia, ku yura təntə yɪ wotɪgu, ku wá pu. Yá mánjá tə wa, Yu nə wá pií v bwin ku, v li tian wa, ku yura təntə kùè wàri ku ti ku pwi. ⁴³ Mánjá tə wa, ba nə gùrɪ ku tia, ku ba dun jə, ku ga ba diàn də jə. Yá mánjá tə wa, Yu nə wá pií v bwin ku, v li tian wa, ku wá ja dun, ku ga jə diàn də. ⁴⁴ Mánjá tə wa, ba nə gùrɪ yura tə tia, ku yɪ tia yuu yura. Yá mánjá tə wa, Yu nə wá bwin ku, v li tian wa, ku dàń wá ya Yu *sàń yura. Də tia yuu yura nə wulə, Yu sàń yura də wulə. ⁴⁵ Ku mù yoo tə púpóní Yu sagɪ tə wa, ku wú: «Təntən bɛɛ tə, ku nə yɪ Adamə jigə ləzwəniŋu.» Talɪkwa*fɪ* Adamə tə, v mù jigə siŋu, ku nə pɪn mu, ku nə ba zwè Yu con, lià nə. ⁴⁶ Ku tà Yu sàń yura tə, ba yà dó yáá ba na, ku yɪ tia yuu yura tə. Ku mù kwa nə, ba wá na Yu sàń yura tə. ⁴⁷ Təntən liù tə yɪ tɪran nə, Yu ma fwa wá, ku pa v yɪ tia yuu liù. Bələ nii liù tə mù yɪ Yu sàń liù. ⁴⁸ Ba tə, ba nə wulə tia yuu, nyɪn də bɛɛ tə, Yu nə fwa də tɪran tə. Ba tə də, ba nə wulə Yu con, də nyɪn də bɛɛ tə, v nə nan Yu sàń tə. ⁴⁹ Ndə nətɪ tə, nə nə nyɪn də tia yuu bɛɛ tə,

mə nətu nə wá nyun də Yu sàń bɛɛ tə.

(1 Tesalonikə tián 4.13-18)

⁵⁰ À nubia-ba, á nɛŋə ku tə, à nə pìà, sə à swìn. Yíra tə, tə nə yí nàŋú də jana nə fwa, wàrì ku twá ku yaní Yu pàrì tə wa. Yá tia yuu yíra tə, ku nə wá pɔ, wàrì Yu sàń yíra tə, ku nə ba pwi, wiən tə ku janí. ⁵¹ Ku yí yosəgu nə, à bírì aba. Nə mama, nə bá tí. Nə mama yíra tə wá lwàń. ⁵² Máná don wa, ba nə wá wúrú nabwana talíkwa diun tə nə. Nə mama dàń wá lwàń naa nədu, ndə yíi pwiu də ku súrú nə. Nabwana tə wá wúrí, Yu ga bwin tɪga tə, ba nan də yíra, tə nə ba pwi. Yá nə də yíra, tə ga lwàń ku jì ndə ba nə. ⁵³ Nə yíra tə, ku nə tí ku pwi tə dàń mɛ, sə ku lwàń ku jì yíra tə, ku nə ba tí ku pwi.

⁵⁴ Máná tə wa, yíra tə, ku nə tí ku pwi, tə nə wá lwàń, ku ba tí ku ba pwi tə, ku máná tə wa, ku tə nə púpúní Yu sagí tə wa, tə níi dàń wá sú. Ku swìn, ku wú:

«Tian kúù tɛ̀lɔ́, Yu dí diàn tian yuu wa. ⁵⁵ Tian, sə n diàn tə wa yèn?

Tian, sə n sliu tə, n nə ma zwe lià tə, n gwi tə wa yèn?»

⁵⁶ Tian yí tə twá də cuna, tə ma jə diàn nə yuu wa. Cuna də twá də Yu *nii tə, ɔ nə pɪn *Moyizə nə, tə ma jə diàn nə yuu wa. ⁵⁷ Ku mù yírì nə, nə kəni Yu lèè, ɔ nə pɪn, sə nə dɔ diàn cuna də tian mɛ yuu wa. Ku nətu twá, də nə Yuu-Tiu Zwezi-Kərisə diàn tə.

⁵⁸ À nubisoni-ba, ku mù tɛ̀ntə yírì nə, á zɪga diàn. Á dàná ká pa won mama gwàrì á vànà. Á kənə diàn á tun Yuu-Tiu tutɔŋí tə, á súrì wuuu. Á lwari də, á də tùtùnán tə, á nə tɔŋa á pɪn Yuu-Tiu nə, tə bá ya tutu, ɔ kwa.

16

Səbiu tə ba nə lé, sə ku san lià tə nə, Kərisə nə tí, yoo

(2 Korentə tián 8, 9, Romə tián 15.25-27)

¹ À mù Polə pià, sə à swìn yoo səbiu tə yuu wa, á nə lé, sə ku san lià tə nə, ba nə yi *Kərisə nə ti, ba nə wulə *Zwerizalemə nə. Ku səbiu təntə yoo wa, á də mɛ, sə á fwa ndə nətɔ tə nə, à nə swìn Galasi nagwanaa tə wa, Kərisə lià tə con, sə ba də fwa. ² Laadi diun mama, səbiu tə, á liù mama nə jə, v mɛ, sə v li ku tə, v nə wàá v tún vàn nə. Á tuŋə ku səbiu təntə vàn nə, sə mánǵá tə wa, à nə wá bà á con, á kúù dànà ká lé səbiu. ³ Mánǵá tə wa, à nə wá yí á con, à wá púpúní saga à pa lià tə nə, á tətə nə wá kúrí, à ma tun ba də səbiu tə Zwerizalemə nə. ⁴ Də ku nə mɛ, sə à tətə va, ba mù də à mù wá twá duən nə vií.

Wiən tə, Polə nə pià, sə v fwa

⁵ À pià, sə à twá Masedwanə nagwanaa tə wa à lɛ. Ku kwa nə, à wá bà à na aba. ⁶ Diun don, à wá ya á con diən bələ. Diun don waran*f1* tə mánǵá tə mama wa, à wá ya á con. À nə kúù wá nan á con, sə à vií á wá san nə də ku tə, ku nə wá pa à lɛ à va, à nə vəli lá. ⁷ À ba pià, sə à bà à zıɣı yu nə à mà à lɛ. À pià də, ku nə ya *Yuu-Tiu fira, sə nə ya duən nə ku dání. ⁸⁻⁹ Yu súrí cwəŋə nəzəŋu v pa nə, sə à ma tun v tutuŋı tə yəbə. Yá duŋa tə də dáá zənzən pun. À dán tə wá ya yəbə Efɛzə wa, ku jə vələ *Pantəktə cànà tə.

¹⁰ Timote də tuŋa Yuu-Tiu tutuŋı tə, ndə à də nə tuŋa ku nətɔ. Də v nə twi á con, sə á ja wá zəni á pa v nì v nywání. ¹¹ Sə á liù mama dàn ká mun wá. Á dán saŋa wá də v cwəŋə tə vəli tə, sə v wàní v vií də yazurə. Sə v bà v yí nə də zəni. À mù Polə də *Kərisə lià tə duən tə dànì wá yəbə.

¹² Apələsə mù, v nə yi nə nubiu Kərisə yırı, yoo wa, à lòrì wá nəe kapupu, sə v mù də Kərisə lià tə duən tə bà ba na aba. Yá v yà tə ba pià, sə v bà á con síún. Mánǵá tə wa, v nə ni buu, v wá bà.

Polə sugu tə, v nə ma gúrí v sagı tə

(1 Tesalonikə tián 5.5-13)

¹³ Á dànà ká dwè. Á zıga diàn á kən á waa Zwezi nə wuuu. Á pian á jìàn dàn. Á yana diàn tiàn *Yuu-Tiu tutuŋi tə wa. ¹⁴ Sə won tə mama, á nə fwa á pwéré wa, sə ku twá də sonu ku ma tun.

¹⁵ À nubia-ba, á mama yèé Sətefanəsə də v diè lià mama. Á yèé də, ba mù nə yi təntən lià, ba nə ken ba waa Zwezi-*Kərisə nə wuuu, Akayi nagwanaa tə wa. Yá ba tì ba tiàn mama ba kə Yuu-Tiu tutuŋi tə wa, sə ba ma san lià tə nə, ba nə yi Kərisə nə ti. ¹⁶ À nubia-ba, à lòrì aba, sə á zìlí v mù liù təntə. Á zìlé ba tə də mama, ba mù də wá nə tuŋa də duən zənzən.

¹⁷ À fwa pupwən zənzən də Sətefanəsə də Fəretinatisə də Akayikisə nə twi à con. Ba nə twi à con, ku yi ndə á mù nə twi à con. ¹⁸ Ba dàn à jìàn, ndə ba nə dàn á də jìàn. Ku mù ləzwənyiri təntə á zìlé ba zəni.

¹⁹ Kərisə lià púlí tə Azi nagwanaa wa yəbə, jùná aba. Akilasə də v kan Pərisilə də Kərisə lià púlí tə, ba mù də ba, nə yáá jùnì Yu ba diè tə, jùnà aba zəni də Yuu-Tiu yiri tə. ²⁰ Lià tə mama, ba nə wulə yəbə, ba nə yi á nubia Kərisə yiri tə, də jùnà aba. Á jùnà duən də zìlé zənzən də sonu, ndə Kərisə lià nə mɛ, sə ba fwa nətu.

²¹ Ku tə yi à tətə nə púpúní də à jìàn, à wú: «À mù Polə də jùnà aba.»

²² Liù tə, v nə ba Yuu-Tiu swə, sə Yu cùgù ku tíú. Maranata! Ku mù nə yi: Sə nə Yuu-Tiu bà! ²³ Nə Yuu-Tiu Zwezi nə wá fwa pubwanu á yira. ²⁴ À swə á mama, nə mama míámíán vwə Zwezi-Kərisə yira.